

鉞水齋詩集

二



集詩齋水鉞

(二)

著位舒

餅水齋詩集卷四

元默困敦

紅豆

一點靈犀九轉丹。天長地久別離難。碧紗籠外塵皆積。玉唾壺中淚未乾。紅入杏花空自鬧。青拈梅子可曾酸。不知把酒東風者。種出雙雙若箇看。
憶得東禪寺裏期。安牀鎮日坐相思。華年冉冉春如海。芳樹陰陰子滿枝。林外不收金作彈。局中肯信玉爲基。銷魂斗帳明珠夜。殘夢迷離獨去時。
愁絕仍將險韻拈。比紅詩寄綵豪尖。花開寂寞逃禪地。人在玲瓏記曲簾。不惜珊瑚盈尺碎。曠教楊柳一聲添。夜深誰誦吳都賦。卻背銀缸啓玉奩。
夙世王維入夢遙。秋風南國最無憀。啄殘鸚鵡三珠樹。開出枇杷萬里橋。井底眼花狂客賀。門前心事路人蕭。烟波十四松陵曲。一例紅情諡洞簫。

上元詞

遲作今年十日春。東風閒殺紫姑神。相邀一局天公戲。輸卻瀛洲萬玉塵。

十三已過上燈期。雪未全消月到遲。試問春寒誰管領。梅花八十一胭脂。
辛苦江關作寓公。兩年瞥眼試燈風。那知太乙青藜杖。不在銀花火樹中。
語兒中涇春水吹。杉青牖口櫓歌回。不知燈火樓臺上。今夜開窗是阿誰。

築軒大令贈裘

去年北風吹不休。主人贈我青羔裘。酒酣以往不忍著。卻向黃竹箱中收。
今年東風射春箭。花凍紅燈上元宴。飛落鴛鴦雙剪刀。牽雲曳雪重相見。平生讀書愛五更。
往往風雨聞雞鳴。曉寒不向夢中賦。婉此一尺銀鐙繁。黑貂已敝長安道。
十丈紅塵不能埽。綵筆空題白練裙。儂歌自唱黃繇襖。殷勤鶴氅來君家。
主是烏衣客絳紗。一身仙骨冷於鐵。開出萬朵青蓮花。主人之裘有時敝。
主人之情永勿替。以詩報君非感恩。君不見緇衣詠爲風。綈袍重其意。

玉女四首

玉女由來住玉京。傾城消息步虛聲。三更風雨披衣坐。九點山川侍笈行。
會向瑤臺看種樹。不隨銀漢悵吹笙。上元寶籙分明在。統領青腰十萬名。
雲車風馬恨來遲。清淺蓬萊又幾時。縹緲姻緣懷北燭。眞靈圖業在西池。
紫蘭宮靜翩歸妹。青綺窗開瞥見兒。好待碧桃花放後。三千鳳紙寫相思。
五夜風窗色界天。南飛烏鵲自年年。親從丹篆通仙籍。欲向黃姑買聘錢。
作記張華矜博物。題詩郭璞愛

遊仙不因一餉投壺戲。玉齒何由得粲然。
龍谿新撰紫陽銘。再拜傳言阿母聽。秦贅得邀吹笛史。齊諧應記渡河星。洗頭翠嶂三生石。叩齒黃庭一卷經。癡絕玉皇香案吏。不知卻扇是坤靈。

夜雨卽事

水鳥呼春夢。微茫入夜分。一燈低作影。五鼓溼初聞。瑟瑟窗間竹。溶溶屋角雲。來朝晴未可。穿眼望東君。

胡石齋丈見示歲莫雜詩八首。皆用拙韻。因再疊前韻題其後。
情真不厭深。詩好不厭讀。傳來夜坐名。譜作春寒曲。芳序有炎涼。清謠無斷續。誠子箕與裘。懷弟河及岳。看囊雖涇錢。輜匭猶藏玉。吟壇似積臺。歲晚催紛屬。險韻夫如何。澆以杯中綠。

二月一日雨晴作歌

北方之水歲壬子。白龍掉尾行不止。日月依然天上行。但隔浮雲萬重耳。浮雲作雨雨作泥。下界茫茫雙屐齒。春人擁褐坐春寒。一寸春愁一尺水。今朝晞髮陽之阿。圓君浴出扶桑紫。譬如久別乍相逢。瞥見還疑仍熟視。芳草都從階溜生。宿鶯微隔林烟起。須臾簾影蕩玲瓏。敝裘從此無情矣。乃知醉醒各有時。陽舒陰慘天長技。況復今年是閏年。爲想東皇非得已。怕教人世得春多。苦將一雨來相抵。豈知九十正堂堂。請作新年今日始。

還家日戲呈陳髯

去築逍遙館。來尋繾綣司。一塵仙謫早。三索妹歸遲。問字甯無酒。催妝但有詩。殷勤雙翠羽。此意定教知。
丁受五廣文。招同唐靖川。皇甫仲和兩孝廉。錢履菴秀才。過石佛寺早飯作。

六代莊嚴地。三生歡喜緣。況當良友會。復此好春天。幽興扁舟外。長齋繡佛前。吾儕似鷗鳥。數點逐谿煙。
落葉西風海。曾逢老衲家。空山一瓢酒。流水兩年華。草長纔通屐。林菲漸著花。恨無題壁字。眷眷碧窗紗。
花生日詩魏塘道中作

等道東風第幾番。買絲來繡護花幡。平生恥作公家語。但爲花神撰壽言。
啼鶯如夢送歸艎。月子平分夜未央。願取鴛鴦湖裏水。釀成春酒寄花嘗。
雨落風開事偶然。青春初度有情天。無因細算花年紀。今日分明又一年。

南湖歸舟漫興

依棹江湖接太虛。洞簫聲裏月來初。者回風信帆無恙。徹底春愁水不如。兩漿綠鷺籬下犬。一鏡青唱夜
深漁到家。已是三更後。手自敲門問卜居。

再贈陳髯

華陰居士古陳搏。手弄梅花過歲寒。半世雄心磨劍具。一鎧老眼借書看。登山臨水年年別。嫁女昏男事事難。
賴有水天閒話在。詩情迢遞酒杯寬。

石門夜泛至六里橋雷雨泊船

玉女三更笑電開。一篙短夢醒春雷。不嫌艇子悠悠泊。得傍桃花淺處來。橋南寒食一絲風。細雨經時過社公。明日到家晴便好。爛泥還有路三弓。

采桃花曲

夾岸多芳樹。東風繫釣家。流人歌水調。春網落桃花。我卜邨南宅。來浮舍北查。卻勝劉子驥。遠際訪紅霞。家近桃花岸。人開竹葉扉。折枝香一手。渡水燕雙飛。雨漲青銅鏡。風吹白袷衣。中流迴素舸。絕似采蓮歸。

秦二世以後宮殉葬。始皇於驪山事見史記。夜讀杜牧之阿房賦。偶作一詩。咸陽宮殿卷衣裳。寶鏡曾開六國妝。萬里山河鶉首醉。二陵風雨鮑魚香。翠華有路巡東海。黃土無情近北邙。三十六年不得見。翻從地下識君王。

宋昭儀王清惠者。隨元兵北去。題滿江紅詞於驛壁。有從容圓缺之句。文丞相見之。歎曰。夫人於此。少商量矣。乃用其韻。代作二闋詞。竝載徐虹亭叢談中。余讀文山詞。絕佳。益不能不爲昭儀惜也。

邊月分明別調彈。樂昌破鏡不成團。南來漢使蛾眉老。北去蕭娘細馬寒。識字早知憂患始。做人何止笑啼難。曲終會有湘靈瑟。那畧沖華乞女冠。

荊棘銅駝夢又成。美人消息出傾城。兩宮華髮應憐妾。三日春潮解避兵。丞相黃冠揮手事。將軍碧血斷腸聲。岳鄂王滿江紅詞。亦用月字韻。玉臺無恙金甌缺。四壁青苔萬古情。

紅白薔薇花歌用昌黎山石詩韻

繚垣青粉雙薔薇。東風開簾蝴蝶飛。我坐看紅復看白。楊花輕薄桃花肥。少游醉臥古藤下。得句無力春雨稀。遣山先生絕標格。比若季女悲朝飢。獨賞芭蕉與梔子。詩家一徑爭雙扉。那知撚髭各有得。硬語不礙清言霏。我吟秦詩用韓韻。聊與二公爲解圍。矧此花枝本殊絕。豈獨兒女供熏衣。薦之少府事太俗。品以野客才不羈。遮貧若能買一笑。吾微此花誰與歸。

楊花詩

歌殘楊柳武昌城。撲面飛花管送迎。三月水流春太老。六朝人去雪無聲。較量妾命誰當薄。吹落鄰家爾許輕。我住天涯最飄蕩。看渠如此不勝情。

觀演長生殿樂府

一飯張巡妾。三秋織女星。他生原未卜。此曲竟難聽。羯鼓催鼙鼓。盤鈴換閤鈴。青山啼杜宇。何處雨冥冥。奉詔慙高頴。題詩怨鄭畋。佛堂埋玉樹。仙海寄金鈿。客唱霓裳序。人輸錦轡錢。江南花落後。重見李龜年。白髮談天寶。琵琶喚奈何。未應來赤鳳。從此老青蛾。楊柳詞成讖。梨花淚更多。至憐湯殿水。兵馬洗天河。酒綠燈紅夜。春風舞一場。亂離唐四紀。優孟李三郎。國事休回首。詩篇說斷腸。誰知新舊史。多爲郭汾陽。

一聲

一聲銅斗喚揚舲。六曲銀環看掩屏。朝鏡家山愁外綠。夜船燈火夢中青。微暄天氣衣應減。乍別情懷酒未醒。曾是三層樓上坐。玉笙吹徹與誰聽。

寄懷女牀山人

傾城消息記秦樓。卻扇詩成一顧羞。最好風光前四月。梅花鐙下看梳頭。
三間茆屋數家邨。流水年年綠到門。買得扁舟風似葉。落帆聲裏近黃昏。
愛聽新聲白紵歌。玉笙吹處隔銀河。夜深別奏歸風曲。紅燭遮簾喚奈何。
玉釵敲枕憶眠時。翠斂雙蛾避侍兒。定有鐙花成遠夢。不知紅豆是相思。

月夜出鄉思橋

霜月一天闊。煙波兩岸收。誰憐今夜夢。忽起故鄉愁。橋影帆初落。鐘聲水自流。
有人吹短笛。知倚幾重樓。

南塘

南塘秋盡夜如年。蟹舍漁莊路渺然。殘月曲隨三汊港。橫風分送兩來船。
篋中翡翠成相憶。湖上鴛鴦笑獨眠。侵曉泊舟何處寺。一聲鐘散萬塵緣。

陳序璜明經屬題其母氏遺詩

一朵慈雲一卷詩。清才苦節兩傳之。他年若乞徐陵序。朱鳥青牛總未知。
生男作客半如無。集中句此語淒涼眼欲枯。忍把浮名輕換了。雌雄三卷孝經圖。

石門縣齋喜晤彭樛亭同年兼卽送之淮南

曾踏紅塵舞柘枝。重來狎恰有相思。兩年風雨分南北。一鏡鬚眉照別離。
今夜如逢習主簿。前身豈是杜

分司扁舟未便相留苦。東閣西亭正要詩。

橫塘

葉落橫塘有逝波。畫船猶唱采蓮歌。沼吳人去春風老。破楚門荒暮雨多。此地煙花非玉樹。向來麋鹿是銅駝。君王自忘三年話。不爲傾城怨芋蘿。

舟行望虞山

遠際芙蓉翠似鬟。孤舟相對露孱顏。碧雲欲合天將暮。秋氣當悲客未還。萬點寒鴉歸落葉。四圍流水抱空山。孟嘉正有登高興。風雨重陽肯破慳。

五人墓下作

殘碑一丈字猶丹。落日山塘拂薜看。慷慨何殊酬國士。倉黃無那惱中官。狗屠血濺三關熱。馬鬣封流一水寒。回首西山魂魄餒。碧雲何處葬衣冠。

太湖歸舟聽雨

黃昏放棹行。回首暗重城。天地正秋色。江湖多雨聲。水窗燒燭短。斷岸入煙平。長嘯懷漁父。蘆花萬點情。

雨夜懷唐六稚川

霞露中央夢有無。依然秋句點江湖。折殘樂府水楊柳。啼殺澤家山鷓鴣。門外綠橫三尺淺。窗中青翦五更疎。故人倘憶潮來夜。楓落吳江舊酒壚。

拄杖西堂雨厭看。卷簾消息別離難。黃花三徑暮煙瘦。落葉半牀秋夢乾。吟蟀衣裳歸謝絮。撲螢庭院避齊紈。不知白石山中客。曾與詩人一樣酸。

稚川嘗作夢遊羅浮歌。頗有所指。今其稿尙存。僕處夜分檢筭。重爲循覽。戲作一詩。題後寄還之。曾向朱陵叩玉妃。峭帆離合是耶非。男昏女嫁青山笑。月黑花深翠羽飛。笛裏長歌當一曲。酒邊閒夢寄雙扉。分明遷客龍城錄。細字蠶眠寫不肥。

題韓偓香奩集

早傳鸚鵡是郎君。三日吟來齒尙芬。似此傷春復傷別。人閒不止杜司勛。紅箋小疊寄天涯。攬力偏難草白麻。若使當年眞作相。箇詩何異宋梅花。

書屈賈列傳

夜讀離騷心惻惻。又觀賈生長太息。美人香草怨如何。斜日寒林看不得。左徒太傅自孤忠。一片丹心異代同。宣室鬼神虛半夜。洞庭木葉對西風。楚宮漢殿容明哲。寵任曾居大夫列。積薪且欲圖久安。樹蕙何曾傷萎絕。一自蛾眉謠詠來。賦成鵬鳥總堪哀。三年謫宦徒爲爾。五日招魂安在哉。洛陽年少高陽裔。辭令何如治安計。怨深休恨楚懷王。恩薄猶憐漢文帝。君不見長風萬里大江橫。波浪兼天我舊經。屈子行吟賈子哭。千秋併作斷腸聲。

昭陽赤奮若

出門

出門何惘惘。辦裝亦每每。生此離別天。觸彼功名壘。功名未可知。離別乃現在。在山馬彳亍。在水船欹乃。行行重行行。采采復采采。柴門月上時。歸夢遙相待。

平望

七十二峯青。春風吹洞庭。水連平望驛。人到垂虹亭。折去千絲柳。浮來一點萍。吳歛聲更苦。今夜最難聽。曉出潯墅。午次錫山驛。與唐靖川表兄作。

夜登北濠舟。朝出南望路。船底春水生。船背春風度。孤帆破空來。二客高眠去。夢醒雜市喧。知近梁谿渡。青飄酒一旗。紅倚檣雙樹。蒼然見惠山。惠山尙如故。憶此山之麓。往還不知數。著屐慳無期。倚棹虛有慕。雖得放眼看。母乃當面錯。叶昔聞禽與向。五嶽遊勿顧。爾我豈異趨。一山惜百步。不作已然悔。所懼未來誤。願聽迴颿颺。直入山深處。寄聲秋爲期。茲言倘不負。

渡江

春水一江流。春山江上浮。我船翦江去。白浪打船頭。海色遠相接。鐘聲高未收。落帆齊著力。指點到瓜洲。夜抵邗關戲成。

甯種芍藥花。莫贈楊柳枝。明明二十四橋月。曲中一折長相思。勿相思且相送。舟搖搖。水花動。關門不放夜行船。要鎖春愁稅春夢。

高郵懷秦太虛

微雲衰草豔相傳。淮海風流五百年。眼底酒杯誰解唱。古來門巷總堪憐。三生桃葉論長恨。萬里藤花怨左遷。我掉扁舟弄明月。思君三十六湖邊。

渡河

昨向淮南泊。微風送綠波。今從江北望。斜日渡黃河。浪卷中流白。花開隔岸多。回頭謝舟楫。載我幾番過。

魚溝

拂面緒風吹。蒼然暮色來。亂鴉逢樹定。荒店望塵開。燈火雙車轍。河山一酒杯。相思能幾寸。量徧輭紅灰。

宿鄒山大風雨作

輝輝霍霍電光駛。霹靂一聲割龍耳。長風負雲雲下垂。俄而雨逸不能止。披衣驚坐嗟客子。夢中呼喚相汝爾。衾裯潑水鎗欲死。頃刻蒼茫竟如是。十日上水船。五日下午澤車。前程行行未及半。明日况瘁愁僕夫。忽聞山東父老言。去年無雪荒我田。宿麥未種高粱乾。縣官禱祀虹在天。太空冥冥誠哀憐。此非雨雨乃雨錢。農夫望春雨。征夫愛春晴。征夫不晴且自征。農夫無雨何以畊。瞻彼青雲觸於白日雨。寸則寸。尺則尺。一雨三日誰之力。雖使我馬沾泥亦不惜。

雨行郟城道中晚抵李家莊作此解嘲

避雨趨山行。入山卽逢雨。始知天公心。趨避兩不許。此意殊微茫。難與僕夫語。僕夫方怨咨。遷怒及馬股。十步九不前。一步一蹇楚。蹇楚亦何爲。久矣辱泥土。馬心願請行。馬足實不舉。爾其聽馬鳴。爾馬比爾苦。雙輪生四角。泥黃沒草綠。九折驚客心。一跌失馬足。掀而出于淖。客與馬俱浴。雖復困泥塗。亦頗滌塵俗。御者嘖有言。今夜何處宿。淒如喪家狗。急若走險鹿。鞭長風壁絲。義重雨瀉瀑。瞻衡欣載奔。飽喫小米粥。逆旅有主人。問客來何晚。爲言天欲雨。況此路尤遠。深重主人意。食我爲我飯。夜雨乏兼味。翦韭春一盃。飢者易於飽。寒者易於煖。燈昏膏自煎。屋卑漏亦短。將爲郭泰播。又近嵇康懶。且來疥土壁。再至塵應滿。琅邪書院與唐六稚川夜話

飄零身世別離天。道是無緣卻有緣。人愛白駒留永夕。書傳青雀感經年。心驚遼海三條燭。手指齊州九點烟。促坐不愁風雨至。向來堅約對牀眠。

清風涇上讀書樓。鐙火蕭條五閱秋。今我周旋仍故我。舊愁牽引入新愁。乍吹向秀山陽笛。未買張融岸上舟。須信主人還是客。白雲無際綠萍浮。稚川近又自號萍樹。

簷花細雨落春卮。難得人生此一時。與論交情清似水。再抽離緒亂於絲。烟霞性別紅塵輟。香火緣深絳帳垂。焚硯不成仍洗硯。頭銜新署右軍池。稚川篆其石曰洗硯池。上客蓋其地爲右軍故蹟也。

又聽羣雞膺膊鳴。籠燈送客是平明。愁腸似共車輪轉。別思都隨細草生。行路尙餘千里遠。看山祇願一

春晴。西風倘就重來約。肯忘琅邪百雉城。

蘭山尉李鳳書嘗作塞上絕句甚工。余於唐稚川席上見之。值其罷官將去。感而贈詩。尉長洲人少。有聲庠序。與余爲表兄弟云。

誰將屈宋作衙官。常建溫岐一例看。文字緣難書吏牘。功名身竟誤儒冠。偶同情話今宵永。况在他鄉此會難。爲道嘔心窮塞主。當筵須放酒杯寬。蓬飛萍泊兩難知。我去君歸共此時。紗帽不能五斗俸。錦囊猶贖七言詩。青山白馬還家近。小翠空花送客遲。此去臨谿李十一。定從江上弄琴絲。

青駝寺夜雨寄唐六

通宵細雨作春泥。到處嫣黃沒馬蹄。數里店遙謀野宿。三更車殆借牛騎。也知作客身原苦。轉爲思君首重低。寄語哥哥行不得。亂山深處鷓鴣啼。

曉出青駝寺喜晴

宿雨纔消似酒醒。東風馬首響銅鈴。烟開古柳萬條碧。日出春山四面青。麥子田分高下岸。野花香闌短長亭。銷魂昨夜青駝寺。猶是繩牀枕手聽。

蒙陰道上花朝有寄

白馬踏青草。征人行太早。車中聽鳴鷄。林際遲飛鳥。好風何處來。記取百花開。樓閣怨復怨。關山歸未歸。

關山望無極。樓閣空消息。花落又花開。相思不相識。私札寫春寒。長途惜夢殘。何須怨離別。且自報平安。

重過泰山作

一山忽當前。衆山皆在後。未至響我心。既至賴我首。蟲蟲南天門。呼吸帝左右。春迷九點烟。海瀉一杯酒。當年策青駒。衣短笠伊糾。豈意及五稔。再向此山走。昔往雨霏霏。今來萬楊柳。悵然感時物。行役亦永久。欲尋向所欣。俯仰了無有。岱宗夫如何。我懷杜陵叟。

泰安道中絕句

遺棄誰求封禪書。千秋猶陋馬相如。如何袞袞咸平相。不及孤山處士逋。碧霞宮殿望崔嵬。海日扶桑曙色開。一朵山桃花插鬢。側輪車上進香來。石子玲瓏當路生。轂三十輻感長征。明朝去宿開山廟。直指平原縣裏行。

平原顏魯公祠

范陽飛牒事情乖。萬里風雲入壯懷。帝識李平馳閒道。天留元結與磨厓。綵豪氣象書應透。青石功名跡未埋。曾讀唐書新舊傳。四朝遺淚爲公揩。

自德州趨劉智廟

行過浮橋落照銜。荒邨一簇指松杉。田閒白屋多因樹。天際黃河遠見帆。妓老琵琶猶解唱。客飢粗糲亦供饒。綠桐漸有還鄉夢。畫角聲聲到枕函。

徹夜

徹夜風聲撼紙窗。石家蠟燭影幢幢。同槽斲草憐疲馬。隔院飛花感吠龍。薄倖名非十年杜。銷魂賦有六朝江。相逢可要青團扇。與畫乘鸞霧一雙。

蘆溝橋行

蘆溝橋來去路。舉子忙。關吏怒。青袍中央坐。寵官兩廊吏役圍春寒。公車歷碌止橋側。一一呈取文書看。彼官肉食不識字。以目上下僞作觀。衣裳在笥書在腹。公雖無稅私有然。爲言客囊久差澀。恰有二百青銅錢。供君一飽如律令。君其努力頻加餐。試禮部者譏而不征。其索錢每以飯食爲名。寵官睨錢如未足。買菜拾矢再三瀆。增之一分笑口開。車聲隱隱過橋來。

書家書尾

我向長安笑。真成舞一場。杏花空自鬧。燕子爲誰忙。更在孫山外。何時錦瑟傍。且尋湖上棹。七十二鴛鴦。不解留春住。惟應近夜來。音塵千里隔。燈火十年猜。尙有泥金夢。爭知抱玉回。願卿藏斗酒。百罰就深杯。

張尙之秀才與余別於揚州蓋三年矣比來京師相見甚歡而余適當南下祇可作一夕話耳

綠楊城郭赤欄橋。江北江南入望遙。一夕秦觀逢把酒。三年韓綽記吹簫。曾無白鶴騎春夢。祇有黃鸝唱早潮。今夜懷人芳杜若。青燈相對續離騷。

神仙富貴兩相違。惟見緇塵染素衣。蕩子眞成行不得。故人恰與送將歸。浮萍春水前身想。行李秋風後

會稀。若向真心問消息。本來長住是禪機。

別靖川

花落聽無聲。恩恩唱渭城。與君俱失意。此別最關情。歧路紅塵合。高堂白髮生。淹留吾未敢。襆被重行行。

出都贈宋左彝助教

我初擊筑黃金臺。紅塵袞袞悲風來。酒徒酣眠美人老。十年意氣狂歌摧。燕南陲與趙北際。不合中間大如礪。泊鳳飄鸞太等閒。呼牛應馬真容易。竭來忽憶江南春。江南梅花愁殺人。可憐三疊一杯酒。安得四角雙車輪。車輪迢迢碾清夢。杯酒遲遲肯相送。豈無短髻重趑躅。幸有微吟相狎弄。風流宋玉誠吾師。千冰萬雪邀題詩。辛苦何須怨行路。蕭條猶幸生同時。君不見高堂明鏡關山月。朝如青絲暮如雪。願從烏鳥乞私情。不爲驪駒傷遠別。雲白山青萬里心。西湖南湖相與深。北堂萱草年年綠。掩耳不聞遊子吟。

三家店卽三角淀

店名誤三家。客夢爭一宿。歌者倚市門。君子在板屋。爲言且勿歌。歌長不當哭。彼若罔聞知。向客再三瀆。或彈伎人箏。或擊酒徒筑。鳩面而鵠舌。皇然駭耳目。客誠無計施。回首屢顧僕。僕云阿堵物。與之則不復。且上李斯書。不障祖約簾。持錢出門去。四座罷絲竹。

雄縣見月

昔作騎驢客。東風吹我衣。重來楊柳落。此去鷓鴣飛。野店新開酒。荒城舊合圍。不知今夜月。幾見遠人歸。

趙北口曉行

東方沈沈天欲白。落月殷勤送行客。寒鴉已起道旁柳。瘦馬初登橋上石。車中人兮孤夢醒。隔店惟見疏鐘青。心知此地是燕趙。悲歌慷慨吾曾經。前年去時春尚早。去年來時秋已老。今年歲晚北風寒。行色怱怱失昏曉。問君襆被來何遲。長亭短亭君不知。流水淒煙杳然去。闌干一曲車驅之。馬煩車殆猶難住。未識明年在何處。惟有橋邊舊酒樓。青旗不改春風路。

河間琵琶行

車班班入河間。河間姘女工數錢。數錢請上琵琶弦。爲君躊躇一再彈。一彈絃未整。再彈聲忽警。三彈四彈風雨并。不見絃絲見指影。絲者不如竹。竹者不如肉。被服羅衣裳。當戶理清曲。曲聲齊唱滿江紅。催曉疑是商玲瓏。千呼萬喚徒爲爾。千山萬水愁殺儂。別有危絃促柱起。南部烟花非北里。滿堂賓客不願聞。兩豆行將塞其耳。耳可塞。心欲死。君不見遼海文章亦如是。

宿阜城旅舍見戊歲題壁宛然感賦

前年驅車阜城驛。醉裏曾題雪色壁。祇憐過眼似雲烟。那知留卻飛鴻迹。急召主人深謝渠。爲我護持詩及書。主人言非愛公作。比年屋破懶埽除。又言昨有兩客投此宿。一客昂頭向壁讀。彼客移鐙往就之。此客怱怱卽鈔錄。問渠客自何方來。云是直指黃金臺。姓名未卽叩誰某。身長七尺多鬚眉。我聞此言三太息。疇昔交遊無此客。天涯莽莽風蕭蕭。得一知己不相識。嗚呼人生知己良難得。相思一夜頭應白。

周亞夫墓

劒通相齊王。相背不得悟。許負相太尉。相口不得哺。三十六將軍。那得知其故。功成侯易封。事去吏亦怒。我過景州城。何處亞夫墓。不知細柳營。惟見白楊樹。

鳳尾

鳳尾檀槽今尙存。重來恩怨曲中論。素衣已被緇塵染。不是青衫舊淚痕。

縣駒里

城郭突兀煙火稠。石子滿地歸羊牛。車輪到此忽聲確。入眼知是高唐州。城門四扇夕不鑰。用便使驢傳輕郵。客行藉此無禁止。快作南北東西遊。我本南北東西者。往返奚翅易葛裘。山東景物不足賞。但於古蹟頻誅求。道旁有碑高丈許。片石獨爲縣駒留。駒也生無他技巧。要惟矢口揚清謳。乃能變移及風俗。遂遣齊右開歌喉。至今箏琶盈兩耳。母亦猶是駒風流。淳于滑稽本辯士。炙轂不數談天鄒。當年借駒設客難。甘與孟氏相爲仇。豈知駒名以此顯。居然一曲懷千秋。甯無陽春與白雪。郢中客散誰倡酬。此事有幸有不幸。驅車日暮心悠悠。

書左彝泰山詩後

史遷博遊覽。始能爲文章。著書成一家。亦向名山藏。新婦閉三日。丈夫志四方。人生苟有緣。不在道路長。岱宗崔嵬巍。衆山出其旁。長風駕萬里。天海搖青蒼。思我疇昔遊。神氣猶飛揚。今來逼寒威。不獲趣急裝。

歧路惜尺咫。齊州但蒼茫。能著幾量屐。誰吞百里糧。因君梁父吟。三歎心激昂。何時乞真形。攜手朝玉皇。
勸酒歌贈吾漁璜農部祖望和宋助教

飢寒在身前。功名在身後。悠悠行路難。不如飲醇酒。磊落執戟郎。支離灌園叟。空餘書一紙。未乞湖三畝。欲證須菩提。嚼蠟關其口。將封狼居胥。投筆掣其肘。夜月啼青鵲。浮雲幻蒼狗。飄然擲一官。拔劍出門走。峩峩黃金臺。酒債尋常有。道逢宋如意。舊是荆卿友。脫裘黃公壇。荷鍤青山藪。醒笑東阿王。醉叱北平守。羽聲寒蕭蕭。東瑟閒西缶。風塵起十丈。雲夢吞八九。美人顏如花。羅裳響瓊玖。的的開朱唇。纖纖出素手。蒲桃夜光杯。殷勤爲君壽。上言神仙難。下言富貴朽。不飲君何爲。君意豈否否。我本燕趙士。爛醉狂歌久。題詩入醋甕。著書覆醬瓿。何常封酒泉。作杯大於臼。細積買春錢。高擁埽愁帚。不嫌丞相瞋。時向車茵嘔。願爲先生歡。請取唾壺叩。劉伶據其左。李白坐以右。三客將奈何。二豪竟誰某。憶昔春明門。識君意良厚。君雁正南飛。余馬亦東首。江南寄梅花。江北折楊柳。萍合本無根。瓜分甯有偶。錄別感窮通。擊節忘好醜。相從和而歌。一字沾一斗。

重題項王墓

玉斗淒涼鐵騎摧。陰陵月黑走烏騅。美人一劍花初落。亭長孤舟夜未開。回首入關當百戰。傷心卷土不重來。依然樵牧嘔吟處。白草茫茫正可哀。

玉冠行

玉冠女子年十九。斜抱琵琶夜行酒。心中之事無時無。眼中之人有時有。自言生小嫁王昌。門對官河春水長。妾攀紅樹乍登閣。郎弄青梅來繞牀。雪南花北恩恩別。鏡裏蛾眉怨新月。無復蘭臺走馬人。空餘藥店飛龍骨。餅有水兮井有瀾。阿侯嬌小阿君單。翻因消渴成新寡。忍爲啼飢絕古歡。本意青山種松柏。雨風風望夫石。菟絲引蔓故不長。柳絮沾泥竟無迹。况復荒邨草不春。連年庚癸聽嘯呻。可憐碧玉小家女。來看朱樓大道塵。濟陰公子仙根李。日日尋春花鳥使。若教傾國得佳人。願向華堂奉君子。無端打鴨驚鴛鴦。何處離鸞思故鄉。思公子兮未敢言。懷佳人兮不能忘。散花小劫天公意。鬢絲無恙腰支細。楊柳三年橋已空。枇杷萬里門應閉。方便蠻箋寄遠心。不知懷袖幾浮沈。楚妃清怨紅絲瑟。蜀客長愁綠綺琴。姑臧太守風情老。五日誰能畏京兆。更無縣吏去催租。不送宮人重入道。依舊當筵一抹春。居然嚼蠟視橫陳。飄零同是天涯客。淪落誰當地獄人。天明蠟淚題玄鳳。轆轤惆悵琵琶送。不須三疊渭城詩。已堪一覺揚州夢。

東平道中寄懷唐六

離別不可道。西風吹杜鵑。美人在天際。流水繞堂前。青鳥三年字。紅塵九點烟。如何左宮枕。飛夢亦茫然。

桃花橋山東江南交界處

一葉桃花渡江南。舊板橋。關心流水遠。回首暗塵消。雞犬人家住。風烟客路遙。分明武陵岸。絕境記紅潮。

汶河晚渡

行李渺何處。盈盈衣帶間。漲痕秋後落。艇子暮來還。古岸白榆樹。斜陽黃石山。再來春水闊。不記碧彎環。

漂母祠

長樂開鐘室。淮陰失釣筒。後先兩女子。生死一英雄。知己自難得。封侯竟不終。至憐祠畔樹。獵獵起雌風。

重題露筋祠

叢祠圍一水。孤棹此重經。詩辭疑紗碧。年華感鏡青。鳥飛白蓮岸。秋見黃姑星。可待成追憶。涼風吹暮鈴。

舟夜聞吳歌左彝有詩余和之

遠采芙蓉夜渡江。鶻聲欸乃近船窗。來朝驚破揚州夢。定是吳娘水調腔。

飲揚州酒樓送漁璜之黃山與左彝

春明門外舊郎官。狹路相逢酒未乾。山色不知婚嫁累。水聲從此別離難。雷塘寂莫誰能送。雲海蒼茫且去看。何日箜篌記歸字。再來西笑向長安。

自邗溝放舟至平山堂作

宿漿江上城。寒煙媚清旭。不知流水深。漸入虹橋曲。稍喜風日晴。未厭往來熟。柔艣忘其機。不避野鷗浴。夾岸睇園林。空濛映修竹。秋聲在樹間。吹我顏色綠。乘興作此遊。竟日謝拘束。宮荒欲弔隋。岡平尙名蜀。不辯廣陵濤。盈盈弄寒玉。

直上平山堂。落葉紅不埽。卻望吳公臺。遙山青未了。大江從西來。日夜流浩浩。六朝風雨多。三月煙花老。

歐陽昔作守。築堂近蓬島。至今遊宴地。思古盈懷抱。始信古人難。江山重文藻。勝地不可常。榮名乃爲寶。不見金谷園。無人拾芳草。

由牖紀事

黑雲夜立黃河隈。河伯突兀騎龍來。衝寒直下三百里。太半排出金銀臺。我方蒙頭酣水宿。清夢正到江南梅。忽聞有聲發水上。耳側以聽心則猜。紛如百靈肅擁節。疾若萬馬趨銜枚。三更何爲飛白練。九載乃欲誅黃能。銀海茫茫使我歎。玉山朗朗非人推。水氣積冰冰打水。冰水跌宕寒皚皚。東船西舫各失手。篙纜艣楫帆檣桅。靈鼉伐鼓轟如雷。吞舟之魚揚其頰。船娘搖手客子默。僮僕對面立死灰。當年驢背尙猶可。今茲魚腹良堪哀。安得錢唐水犀手。強弩飛射潮頭回。急則逼人計咄咄。巨斧橫劈關門開。直送行人渡江去。青山兩朵如蓬萊。行路艱難有如此。賦命窮薄何爲哉。敢云君子有无妄。毋乃天公哀不材。又疑馮夷索奇句。故遣長筇圓珠催。我詩本不一錢直。如此作惡誠難爲。願乞鮫綃一丈五。卻趁浪靜風恬裁。乃投東流贈龍女。報我九曲珊瑚斂。書破許渾溼千首。捷若下水船之裴。衣裳顛倒忽大笑。出險相屬蒲桃醅。海門蒼蒼上紅日。夢中一泣歌瓊瑰。

渡江用東坡自金山放船至焦山韻

我生性僻佳句耽。題詩一路來江南。江南烟波渺無際。野航恰受人兩三。蕭晨無風翦江去。中流自在詩抽蠶。側聞焦山更幽絕。當年招隱真無慙。海雲蕭索護古鼎。修竹掩映臨寒潭。遙看一點青撲亞。老僧禪

榻眠方酣。風餐露宿。歎行客未許。捉麈陪清談。鐘磬無聲曉。霜白。一船遠夢飛烟。龜他年若尋雙不借。雖有風浪心。仍甘山靈。聞言忽拊掌。此念母乃書生貪。問君昏嫁幾時了。山猶如此人何堪。但作此詩破愁疾。爲爾寄寫山中菴。

甘露寺

我攜仙人九節筇。直上北固之高峯。天寬地窄飛鳥絕。江海一氣浮魚龍。登臨豈惜煩耳目。開拓自覺生心胸。山川於我本無故。興之所到情乃鍾。捫蘿卻訪甘露寺。華嚴法界金碧重。山僧蒼顏已不俗。况有二客能相從。宋助教及鄭四事。傳聞狠石臥庭際。歲久埋沒荆榛叢。當年何人好奇計。孫劉諸葛皆英雄。阿瞞伏櫪志千里。欲吞巴蜀無江東。豈知深山一片石。外間大有人圖儂。始因歸妹狎親非。誰信斬將與兵戎。三分割據竊神鼎。九錫慚媿超彤弓。誰能閉門作天子。勢不兩立仍兩窮。不見水濱爭蚌鵲。收其利者惟漁翁。飛橋已驚出山外。巨筏行復衝江中。可憐風利不得泊。遂使王濬貪天功。金陵王氣黯無色。豈獨白帝多悲風。江山第一我懷古。茫茫南北無遺蹤。撞鐘擊鼓下山去。青天落日銜芙蓉。

京口夜話與左彝爲春遊金陵之約

三年熟聽海門潮。依舊飄然一葉桡。山水癖從今夜起。江湖銜向故人挑。思隨黃帽搖雙槳。便訪烏衣到六朝。僕指春風容易過。肯來同上石城橋。

曉雪發金雞嶺

騎馬風吹樹。鳴雞雪滿天。短裘寒有態。狹路酒無邊。山色前朝寺。江聲昨夜船。丹陽城郭近。日夕羨飛鳶。
毘陵舟次贈別惲敬子居孝廉

傾蓋亭前彼一時。深宵風雨惜前期。出門西笑春如夢。此水東流歸又遲。中春相遇於鄭城逆旅。宦境誰尋五斗米。仙才長采十年芝。書生骨相酸寒甚。覲面慙教趙勝知。惲好讀相人書。多奇中。
經年作客悵離羣。天末涼風日暮雲。生本多情甯獨我。歸當失意又逢君。拋殘烏帽塵三斗。看到青樓月二分。若向江南望江北。人閒還有杜司助。

惠山用前韻

我從山下行。望見山前路。山靈有責言。春風計前度。雙屐不得登。孤蓬自來去。來去誰使然。脈脈斜陽渡。失意芙蓉花。銷魂楊枝樹。食言雖有罪。得句非無故。况茲山水緣。每具冥冥數。舟人貪水程。在山本無慕。卽此一葦航。有似六州錯。叶我方行路難。去亦不復顧。且慙抱璞歸。則足寤其步。長歌復短歌。一誤乃再誤。那知苦吟中。是我臥遊處。一笑語青山。於心已無負。

江上別劉將軍

投筆人萬里。把酒江干尋。江水有時淺。人情到處深。輝輝匣中劍。落落花下琴。薄暮一舟急。蒼然吳會吟。
酬別左彝

一月能消萬古愁。陸同車馬水同舟。詩情已徧江南北。更向奚囊空去處投。

崑崙關外少年行。幾許弓衣織未成。那向扶桑更回首。可憐慧苒是虛名。
曾補南陔東哲詩。采蘭相戒敢差池。重來不復愁衣綻。還是臨行密密時。
歸去離歌不可聽。天涯消息柳條青。夢魂得似江頭水。流到塘西乙未亭。
助教所居。

雨行平望道中卽事

谿水碧於海。谿雨涼似水。是雨是水花。點點入魚背。
谿路還湖路。濃陰壓短橈。溼帆愁不卷。搖過畫眉橋。
宛轉吳儂曲。瀟瀟暮雨多。分明翻水調。卻道唱山歌。
歌聲雜水聲。棹入最深處。萬點冷蘆花。兩岸枯桑樹。

餅水齋詩集卷五

闕逢攝提格

初春宋助教過訪弊居竝出示近詩卽送之看梅鄧尉

白雪五更晴。喧簷鵲聲衆。春風吹故人。叩我柴扉夢。入門笑相屬。楚客得一朱。遙情接今歡。溫語解昔凍。既出詩百篇。其詞婉多諷。中蒙見懷什。鐵笛記三弄。見贈鐵笛歌舊事杳莫追。新詩俊堪誦。感茲隙過駒。幸不門題鳳。來欣倒屣迎。去惜牽裾送。式飲且庶幾。酒熟青花盞。

梅花開空山。春氣靜太古。微茫瀉流水。中有數聲鶻。鶻聲搖落花。宜著君與我。君去已有期。我行殊未果。深慙素約違。苦被俗緣鎖。有似網西施。五湖遲一舸。烏啼雪千尺。人夢香萬朵。山靈瞋風塵。花神笑烟火。君今山中遊。定向花閒坐。好好寄題詩。當我曾遊可。

自烏鎮至常熟

挂帆鶯脰湖。湖水凡幾曲。愛此東風吹。一鏡卷青縠。我行昨歲晚。冰雪苦瑟縮。重來夕岸烟。楊柳忽已綠。斜陽絢春樹。樹影在帆腹。時見釣魚船。嫋嫋一竿竹。

春江瀉碧油。春岸驕白鷗。江水不可睡。鷗飛上我舟。轉舵入江郭。人語喧以稠。回睇數峯翠。一抹朝雲收。

思爲萬蝴蝶。夢古梅花樓。

吳閭競上元。鎧火萬花海。絲竹列如麻。羅綺重如鎧。酒腸及花眼。擾擾無自在。薄暮畫船間。脂粉棄烟水。客意正無憀。擎舟出荒匯。天空飛鳥絕。兩漿答欵乃。

疎星明積波。斜月倚高樹。開窗送曉青。心識虞山路。撫景涉曩想。兩歲西風暮。蒼然古芙蓉。徘徊不能去。

拂水山莊作

五百年間事。荒園此尙留。江山空故國。風雨感高樓。木杪孤烟出。門前一水流。分明江令宅。早白主人頭。咄咄占黃閣。匆匆下白門。可憐啼杜宇。不及食河豚。浪子銅駝陌。美人金谷園。江南紅豆曲。惆悵不堪論。關節無公道。窮愁有著書。夢中才易盡。劫後火猶餘。青史看題壁。黃冠笑荷鋤。空門如解識。此事豈消除。

虞山歸舟

桃花水漲青春老。船尾蒼烟涼不埽。夢回篷背聽無聲。細雨濛濛入天曉。客來春事鳥初啼。客去春情花亂飛。試對山靈歌水調。賸教春與客同歸。蕭條寒食炊烟收。野棠花開搖綠疇。瓜皮艇子出陸墓。恨無一杯澆古愁。可憐風雨愁仍在。鎮日蓬窗暗相對。夕陽忽放野田晴。已有歸鴉坐牛背。

吳門逢宋助教

鶯脰湖邊水。迢迢說鬢絲。姑蘇臺下柳。楚楚見腰支。春意梅花鬧。巢痕燕子知。方舟成邂逅。稱妮話前期。

燕趙悲歌客。相逢狹路間。風鐙添半臂。雪壁記雙鬟。古意東西水。閒情大小山。那能尋樂句。拍徧舊陽關。吹笛過淮浦。看濤到廣陵。愁來妒佳月。夢覺踏層冰。談虎公無渡。騎鯨僕未能。江潭窮薄語。難遣夏蟲騰。歧路誰流涕。名山想著書。癡符愁不免。敝帚享何如。白鶴孤飛絕。青琴萬籟虛。幾時杯酒興。相對注蟲魚。

登烏鎮東寺壇絕頂作歌

長繩繫取扶桑景。來上浮圖最高頂。七盤矗矗入三霄。一氣茫茫俯萬井。秋豪之顛目既窮。強弩之末足猶猛。青天白日接混沌。惟見太湖三萬六千頃。湖山一綠搖空來。其勢平遠如烟苔。由旬去此凡幾百。虛無縹緲非蓬萊。我本天涯萬里客。青眼高歌望鄉國。衣裳蒼蒼增暮寒。浮雲飛過紅闌干。斜陽在樹鳥聲樂。埴鈴四面春風拓。一枝鐵笛冷於龍。去向仙人借黃鶴。

月夜還自南湖

趁月掉歸船。月趁我船去。相隨煙水中。微風與之遇。淅淅吹菰蘆。行行辨雲樹。牆竅時動搖。躊躇已達曙。月落風旣靜。流水空無據。認取水中亭。是我往還處。

徐幼文山水軸子爲陳髯作

人外寫青山。山與人皆靜。竭來塵土中。訝此清涼境。想其落紙時。咫尺具妙領。興濃墨愈淡。意繁筆更省。野勢尤蒼然。彷彿秋來景。林疏烟未起。橋斷水無影。我懷夢綠軒。千載常耿耿。君今出此圖。年月記舴艋。自題作於澱湖舟中。詩情北郭空。畫手東湖冷。急展玉鴉叉。寒具且須屏。

苦熱行

裘鍾既退笠扇微。今年六月尤煩蒸。我辭青墩三十里。竹篙詰曲撐新勝。烏篷四圍公請入。黃簾八尺僕未能。青天跌蕩野風死。水波因之以不興。孤鷺之飛不敢過。明霞一鏡鋪紅綾。斯時眼穿夕陽落。那縈白日求長繩。恍疑靈媧煉頑石。補綴五色威凌兢。不然后羿燭九日。昇幹晴震抑釋擲。老農縑纈怨曝背。酷吏桎梏愁填膺。焚心竊比鳩喚雨。炙手難覓蟲語冰。伊誰乘離執火繖。吁此權柄亦可憎。豈無園林坐這暑。浮瓜折藕且剝菱。胡爲宛囑怨行路。襤褸觸取紛頻仍。雖知滄熱各有候。今茲趨炎殊不勝。移舟入夜勢轉劇。蟻抱樹枝魚入罾。衆星搖搖太虛碧。頰散萬點空潭鐙。臨流幾消牛飲渴。揮汗有類鮫珠凝。腸中忽作車碌碌。耳際惟聽蟲薨薨。安得雷鼓走鞠輶。華電焜燁射紫棧。霹靂一礮聲裂綰。三十六天龍躍騰。浮雲決鬱雨溟沐。使我大笑如蒼蠅。

焦山圖詩用東坡郭熙畫秋山平遠韻

陳序璜明經藏家伯父蔗堂先生所寫焦山圖。有自題曰。金焦兩山對峙。然言金山則眉色飛舞。罕有及焦山者。蓋金山景包山。夫人知之。焦山則山包景。非胸有卷軸。未易窺也。客詢其說。作焦山圖以對。乾隆壬午二月既望。澹齋記於丹陽古驛。澹齋伯父舊號也。此圖已閱三十餘年。頃與序璜書扇。偶錄去年焦山詩。序璜以爲先後相賞皆同。乃出示此圖索句。并促作書。乞先生近畫。位既題附卷尾。且錄一通。寄呈伯父。而識其略如此。

大江東去扁舟閒。江南江北多青山。就中兩點最奇絕。恰似邢尹相逢間。客行不厭看山遠。一笛漁蓑弄春晚。當時但記妙高臺。誰識海門橫絕巘。爲埽紙繭搖豪霜。蕭然古驛題丹陽。殘山賸水有人得。臥遊不換硨磲光。三十年來如一日。過眼煙雲生白髮。八分倘許張三軍。五日猶當畫一石。

湖上

湖上明波綠似苔。菱花兩岸雪然開。刺船人在花深處。疑是山陰子夜來。

寄懷唐六稚川都中

北海開樽夜。西窗翦燭時。曾留一夕話。只有寸心知。富貴欺塵土。文章老別離。瑯邪城外柳。還賸幾絢絲。別酒不能飲。山桃花亂開。贈余青玉案。念子黃金臺。秋色三條燭。佳人八斗才。扶疏桂之樹。攀取一枝來。

七夕駕鵞湖舟中二十韻

秋色豆花水。蕭然揚暮舲。衣裳逢七日。風露拜雙星。諧豈齊東野。填應海北溟。神仙自辛苦。兒女太丁寧。舊諾烏頭白。今歡鵲尾青。橋長銀漢注。天斷玉箱停。鳳駕涼初肅。牛閨夜不扃。一鉞人乞巧。三市鳥通靈。幾處書消蠹。誰家扇撲螢。錦機抽緯繚。瓊珮響璫玲。脈脈殊偷藥。遲遲數落萸。淚迷唐殿誓。灰劫漢池形。故事纔成詠。新宮倩作銘。紅牆圍密約。翠被感餘馨。似此離還合。眞同夢未醒。客查愁莫借。仙語遠難聽。闌夕歌黃竹。扁舟破綠萍。佳期教迢遞。好句惜飄零。月墮青瑤瓦。雲歸紫玉舂。世間惟有別。相對但冥冥。

送人之秦淮

渡江桃葉負春愁。一路烟花笑未休。燕子尋常飛百姓。鱸魚容易到三秋。湖山青峭詩人壘。絲竹黃昏蕩婦樓。此是江南腸斷處。冷吟閒醉與勾留。

瘧

冷煖不自知。厥疾名曰瘧。西風颯然來。閒日乃一作。嗟余本無辜。與爾似有約。或不寒而栗。或非火而灼。心兵互勝負。眼花自開落。病也吾非貧。諱今殊近虐。或言求良醫。藥石苦相託。其次驅厲鬼。史巫用紛若。是二皆非然。請試言其略。人生天地閒。寒暑競相薄。諒非金石堅。又被利名縛。飲食失其時。風雨與之搏。是氣所鬱積。寒熱之媒灼。受病有淺深。得病無善惡。病來不在鬼。病去不在藥。去尙不可留。來則豈能卻。翩翩翻金鴉。襪襪眠白鶴。極日照五蘊。游心絕六鑿。物理得自然。人性有至樂。遶遶秋夢醒。汗出於是霍。

中秋夕泛小舟出鄉思橋對月放歌

青天不可以梯。碧海不可以舟。忽飛海底月。照見天上樓。金風珠露美清夜。冰壺玉鑑懸高秋。我從闌夕揚空舲。浪花參差吹綠腥。天上水中各有月。兩岸人家眠瑟瑟。烟中雞犬欲騰空。波際魚龍愁出沒。有酒渴可飲。盛以綠玉瓢。有曲狂可歌。和以紫竹簫。纖雲四卷風不驕。橫渡百尺紅欄橋。悄然舉首睨絳霄。恍惚娥宮萬瓦櫺。櫺排青瑤。問娥靈藥幾時竊。太虛密邇不可說。惟見歷歷種白榆。霏霏落黃雪。蝦蟇背老兔。口缺水精刻桷銀鑄闕。仙之人兮列如麻。浴出丹淵一丸白。我欲騎紺鸞。騁翠虬。左拍洪崖。右挹浮邱。明霞十色華漢流。星衢霜殿爛不收。平視月姊倚飛閣。高寒衣我青鳳裘。題詩笑傲凌滄洲。笠覆杯瀉心。

悠悠乘風歸去不可留。依然水調翻歌頭。歌復歌。愁更愁。安得瓊斤璧鑿修。合四萬八千戶。去作東華西靈南離北貢逍遙遊。

移居呈沈松廬觀察啓

揚雄家無儋石儲。自序乃有宅一區。顏回屢空常晏如。陋巷亦足稱安居。今我之貧異於是。三間茆屋猶催租。生來本無家可別。東西南北紛舟車。前年僦橡向烏戍。蹤迹往往驚樵漁。登堂既已苦湫隘。開徑況復來穿窬。先生知吾有老母。請更爽塏毋歎歎。南華橋頭秋水綠。扁舟願寫移居圖。移居之圖尙可寫。羌此高義今則無。

自鄉思橋移家南華橋

繞樹真能借一枝。秋來烏鵲正南飛。好因夜月同開徑。卻對西風自掩扉。近市晏嬰難免俗。登樓王粲惜忘歸。銷魂鄉思橋邊路。根觸無端戀落暉。

匆匆難辦草堂錢。小住青墩近四年。壁立誰能雜庸保。樓居未必好神仙。偶逢借宅周公瑾。又作移家葛稚川。只有藤花能送我。一株斜倚短垣前。

市橋流水曲相通。家具裝成一葦空。此去全無鵝鴨惱。乍來休笑馬牛風。歡顏底有千間屋。抱鄰吟當一畝宮。最是倦遊風物好。北堂深護綠萱叢。

我生蹤迹本萍浮。此地分明是舊遊。記得梧桐鄉裏路。相逢楊柳水邊樓。攜來雞犬猶能識。容著琴書不

礙愁。卻笑南華名字在。一篇秋水住莊周。

南湖舟中夜雨讀宋助教詩因題其卷

水宿不知秋。夢破三色雨。青鐙翳江湖。何似窗西語。況復古錦囊。美人拾翠羽。微吟流水中。漁唱和容與。舊雨寵碧紗。今雨歌白紵。舒雅酬西崑。宋玉愁北渚。歸舟記筌篲。颯颯鷗鷺侶。銀竹打烏篷。臨流怨芳序。

移居詩爲序璜作

吾友陳髯無家者。四壁之中秀而野。讀書識字六十年。向我時時一傾寫。非惟意氣與我同。兩貧亦足爭長雄。我方儼屋君假館。不信世有安居榮。叶親朋竊笑臧獲怨。草堂之錢不成串。買山而隱古所譏。盡室以行今始見。朱門蓬戶兩相抵。不問他鄉與故里。西湖不住住南湖。拋得杭州有年矣。秀州門邊數瓦簷。五樓十閣如鱗黏。牛宮豚欄各有所。何獨不能容一髯。一昨相逢向我說。風雨雞鳴屢湫隘。偶因舊友得新居。歲在闕逢攝提格。昔也賃廡歌梁鴻。今者移家畫葛洪。雖非卜宅如陶公。頗亦牽船勝張融。誰謀僱石儲揚雄。且盤硬語遺盧仝。全家雞犬三間屋。萬卷蟲魚一畝宮。我住青墩意愀愀。幕燕橋烏誰與偶。得君恰是素心人。與君直作忘年友。君今有子復有孫。老妻嬌女能食貧。卻教一事君輸我。夸於樂天我有母。叶

題陳髯做米家山

海嶽畫山不惜墨。墨氣入山山有力。髯從千載彷彿之。筆牀青削芙蓉色。平生性僻愛看山。五岳方寸時

孱顏君今畫山在何處。他日與君買山住。

夜雨

青天壓白雲。昔昔逗秋雨。缺月久匿輝。涼颼乍抽緒。空階猜躍鱗。枯樹漏棲羽。燈暗不成花。微聞草蟲語。

菊花詩

西烟離落鳥飛回。他日黃花昨夜開。一卷離騷香處續。十分秋色夢中來。翠微風押參軍帽。青女霜搖傲吏杯。欲采相思不盈掬。遲君消息到寒梅。

奉懷宋助教楓橋寓居

鄧尉山頭踏雪來。巫咸谿上掉船回。相逢三萬六千頃。欸乃一聲花亂開。春間余歸自虞山。助教從香雪海來。相遇吳門舟次。誦其游詩。有梅花香五湖句。

春船瞥負五湖期。鐵笛西風怨別離。助教嘗爲余作鐵笛歌。更爲酒人吹一遍。畫眉橋外露青旗。畫壁曾經唱竹枝。雙鬟都記使君詞。無端別譜三姑曲。腸斷吳儂本事詩。助教嘗以長慶體爲武林彈詞。盲女作王三姑曲。歷述盛衰。爲此題絕唱。

江楓漁火近寒山。城外鐘聲客未還。今夜梧桐鄉裏月。又隨秋夢到吳關。幽棲歲月感瑤琴。唐棣詩刪共此心。準待君歸故山曲。三分橋畔一相尋。

旃蒙單闕

雪夜與女牀山人話別

滴粉搓酥勢未休。兩三鐙焰颺高樓。撥殘荷葉思焚硯。開到梅花悔典裘。好與煎茶圍夜話。無端行李入春愁。平生頗笑相如渴。肯遣青山怨白頭。

題謝參軍晞髮集

三尺竹如意。登臺手自敲。百年亡國恨。雙淚故人交。鬼戰冬青樹。春空翡翠巢。殘詩無一寸。沙社幾時鈔。

風涇歸舟

風涇接魏塘。烟景晚蒼茫。孤棹迴殘雪。春潮擁夕陽。夢騎雙蛺蝶。歌起萬鴛鴦。好傍南湖宿。寒林月正黃。

宋助教寄龍井茶

鯉魚風裏豆花香。絕勝三瓶寄夜航。初試西湖好滋味。居然壓倒白雲槍。詩腸渴禁酒三焦。正要甌香細細澆。難覓中泠泉第一。梅花簷下雪初消。南屏茶事妙謙師。禪榻花風感鬢絲。未負青春狂杜牧。喫君新茗報新詩。來書云是靈隱詩僧手焙。

題蘭亭帖後明何運使井欄本

暮春禊事敘臨河。落紙烟雲晉永和。解道脫胎金谷引。便知真本已無多。世說新語注所載臨河敘與今

帖文互異

匆匆繭紙閉昭陵。白石蒼苔難愛憎。似此花開殘帖裏。直須愁殺趙吳興。
野鴨家雞兩不妨。采旄猶贍十三行。誰知新樣元和腳。卻在淮南汲井牀。
冰花初泮玉蟾蜍。一束青縷夢不如。便有春風來挽底。故應玳瑁與裝書。

夜渡鶯脰湖和徐朝玉孝廉升鑒

夢裏吳江接太湖。心情可與昨宵殊。一年春好逢離別。半夜詩成在路途。
風利漸聞流水急。月明忍遣酒樽孤。南州孺子陽春曲。乘興分箋亦自娛。

呂城雪夜寄懷女牀山人

柳絮曾吟道韞詩。迎春時卽送春時。誰知銀海三更泊。祇隔青山五日期。
范蠡湖深魚素杳。呂蒙城晚雁飛遲。高寒忍背鐙花坐。不是熏籠定被池。

京口夜泊聽雪朝玉孝廉置酒請作歌

顛風夜射空江客。江水江風兩相逆。東船西舫悄無言。鷗鵠之聲行不得。
是時江月已無魄。忽現光明入窗隙。初猶天高恣飛灑。旣覺船低競堆積。山遠全開草木心。水深暗壓蛟龍脊。
我生好雪如好色。眼底神仙藐姑射。橋邊林下各有賞。矧乃茫茫來泛宅。掀開黃篋見青天。
四面江山萬花白。平視鳥飛無一隻。塢鈴丁東粉欲滴。金焦兩朵相嬌嬾。
此投瓊瑤彼獻璧。三更夢斷有扁舟。六朝人去無雙屐。徐生少年逸者

流。謂當以酒澆其高。我生畏酒如畏敵。於此不飲良可惜。白戰殊未能。黃飲庶無責。紅泥小火老瓦盆。竹葉清浮蔭葉窄。以酒澆詩詩竟成。以詩催雪雪方劇。呼童披我黃羊裘。至此一寒等絺綌。猶嗟人生貴自適。豈獨蕭條在行役。鐵甲寒沈萬竈烟。香鎧夢遠三春陌。況我南北紛舟車。熟見漁竿與馬策。問君此境是何境。問君此夕是何夕。水精如意玉連環。萬斛春愁兩手擲。明朝騎鶴上揚州。酒花微紅燭花碧。

渡江絕句

霽雪飄然冷作花。過江春色卽天涯。分明破浪乘潮去。那及紅船載到家。青山兩點浪雙涵。半帆輕風疾似驂。今夜蕪城城外夢。定隨江水到江南。三年水國路微茫。來去無端客漸蒼。欲向江神問消息。亂帆已失海雲堂。

過江雜詩

揚子津頭春霧開。瓜洲城外渡江來。孤篷無物輸關吏。昨夜江南雪一堆。樓上神仙到欲迷。曲中公子唱猶低。君王才盡惟看鏡。不許空梁落燕泥。清夜西園遺箇春。珠簾玉箔記來真。匆匆便向聊城去。笑殺胭脂井底人。殿腳三千土一邱。烟花猶戀古揚州。司助但寫阿房賦。那不傷心到玉鉤。豆蔻梢頭事惘然。一生紕繆杜樊川。揚州薄倖還如此。況有湖州十四年。平山誰復繼歐蘇。城向參軍賦裏蕪。十里春風二分月。不宜繁露董江都。

媼神猶自祀蕃釐。一卷經消兩鬢絲。解道韋郎正年少。江東羅隱有題詩。
現宰官身作雅遊。奚囊伎扇自風流。阮亭去後云亭去。此地官名也合休。
王漁洋孔東塘皆嘗爲揚州府推官。今裁。

河橋燈火蕩春槎。衣際鴛鴦鬢際鴉。韓綽不來何遜去。夜深誰唱後庭花。
才過淮南水拍天。別離心似此湖然。不知今夜江關夢。去趁誰家下水船。
水際靈旗祀女郎。不須更辨鹿筋梁。問渠寶帳重重霧。可占人間一瓣香。
十日春寒一破裘。沿隄寶應接高郵。泊舟風雨開船月。腸斷流人水調頭。
淮水東流繞郭門。昔人於此飯王孫。分明拋了漁竿去。卻是冤仇不是恩。
碧霞宮外萬烟波。舴艋初辭見橐駝。一事記來真齒冷。也曾騎馬過黃河。
戊申年事。

車中讀趙秋谷詩

不見飴山客。荒途動遠愁。清狂三爵過。拓落一官休。法曲宮中燕。閒情海上鷗。
平生蕭瑟意。詩卷自長留。正序無由乞。偏師忽見攻。門牆爭附驥。鱗爪獨談龍。
欲覓圍鐘話。先教鑄像宗。如何立趙幟。頻首但稱馮。

趙北口作

南垂北際幾題詩。來自無聊去較遲。彷彿江南好風景。暮鴉啼殺綠楊絲。
烟波無恙釣魚船。此柳依依似昔年。若唱曉風殘月句。桓司馬是柳屯田。

竊藥行

君不見后羿請藥王母前。欲食不食心茫然。娥也竊之大有緣。占於有黃妹翩翩。臣妾逋逃天帝憐。賜以別館名廣寒。中有皓魄清而圓。三五盈缺照人間。金蟾玉兔侍兩邊。白榆紅桂香滿園。霓裳羽衣曲譜傳。紫簫玲瓏挾飛仙。驚起吳質夜不眠。銀河耿耿秋水鮮。下視有窮一點烟。天路隔絕不得言。我聞十日竝出草木煎。絕技射鳥落九天。何不翻身彎弓射嬋娟。徒使青天碧海三萬六千年復年。

城南雨夜與姨生王仲瞿孝廉話舊

一海無端合兩萍。春鐙細雨話曾經。幾從患難傷離別。卻謝才華見性靈。東觀奇書猶記憶。仲瞿前主族祖尙書文莊公家。嘗校讀四庫祕書。西州華屋已飄零。感懷外舅進士金夏峯先生。也知塵尾尋常事。肯

遣山公歎寧馨。

黃金費盡別無家。鏡影簫聲近若耶。客有因緣歌續竹。婦如影響筆生花。仲瞿雙偶。後爲贅壻於山陰金氏。其婦名禮羸者。能詩畫。已教柳絮吟成雪。更遣桃根散作霞。自向丈人峯下住。醺蕪不用采天涯。仲瞿有妾。亦寄食婦家。故其詩有娘子軍中分牛壁。丈人峯下託全家之句。

浪花歌唱秀州城。往復扁舟欸乃聲。湖上鴛鴦多識我。江東鸚鵡不逢卿。置書懷袖經三載。入夢風烟近五更。誰信安牀紅豆底。相思重與聽雞鳴。

知音容易賞音難。橡笛薪琴太等閒。恩戴龍頭豈頑石。始欲掄元既置第十八人。書藏婢口亦名山。袁香

亭太守家有婢能背誦仲聖書試卷。腳根五岳商禽向。挽底千秋出馬班。聞道長安居不易。春風野火且休刪。

分明

分明銀漢限紅牆。依約珠簾卷玉房。但見彩鸞書舊韻。不教飛燕倚新妝。桃花天上甯無路。柿子今年定有霜。聞道丹梯三十級。也應愁殺賀知章。來時西笑向長安。待得花開不許看。名士文章成畫餅。神仙爐竈有疑丹。龍腮暴後波方起。蛇足添來酒亦殘。一樣枝頭春意鬧。宋祁容易宋郊難。

瓶中芍藥

杏花怒而飛。人唱東風惡。汲此水在瓶。供奉紅芍藥。可憐買春錢。已負賞花約。春來與春去。花開又花落。側想車馬喧。紅塵合西郭。看花眼雖多。愛花心轉薄。不如婪尾杯。自向羅筵酌。相對話春深。花神笑曰諾。夜讀南華經。蝴蝶飛一箇。彷彿到豐臺。風塵起堀堞。驟現竹笆籬。流水遶其左。紅欄白板橋。一綠不可唾。我時策孤筇。信步罔知情。道逢縞袂嫗。折花如斗大。殷勤相餉遺。忽向石根墮。低頭拾殘枝。已被青泥泥。指點虛無間。歸路誰能那。迢迢桃花源。悄悄芙蓉邈。恰有賣花聲。春夢常窗破。種花在城外。賣花在城裏。春聲一口香。春色一肩紫。賣者移其根。買者摘其蕊。作文旣九錫。占爻亦三觀。美人在深閨。嬋娟以此豸。簪花花不如。兩鬢鴉雲委。亦欲贈同心。春風陋溱洧。

紅者豔宜賞。白者淡可玩。摩挲綠銅瓶。供養青玉案。無意忽目成。有芳來鼻觀。看紅復看白。能使眼花亂。亦不怨眼花。所惜夜將半。微風搖鐵檠。缺月低銀蒜。何處寄朝雲。好好書花片。問春春不語。春去竟如許。欲覓返魂香。誰是司花女。揚州金帶圍。零落無處所。已曾鬧蜂蝶。況乃多風雨。且須待來年。尋花命嗜侶。胡然恨今宵。卽事傷情緒。

比部楊六士夢符。曩於陸杉石太守處見僕所撰詠史樂府。擊節枉顧。會僕臥病拒客。尋又以事南下。雖名刺往還。而曾無半面之識。比僕再入都。則先生下世久矣。重過所居。愴然有作。并錄一通寄杉石雅州。

韋杜城南路。東風墮綠苔。當年題鳳去。此日弔蠅來。況值春歸晚。真成興盡回。遲君三十步。門巷記楊梅。六士所居在楊梅竹斜街。

作客悲離合。懷人隔死生。兩行知己淚。一卷少年行。渭北詩無敵。山陽笛有聲。芙蓉湖上路。何處閉佳城。執戟君還壯。揮豪我欲愁。那知擬樂府。渾未識荊州。磨滅懷中刺。棲遲醉裏籌。朝來驢子背。忍向錦囊投。長安花又落。蝴蝶向人飛。書札徒盈篋。烟塵欲染衣。彈琴同調少。騎馬舊遊非。歎逝誰能賦。因之問陸機。女牀山人書問寓居近味雜寫家書尾答之。

無端搖出畫眉橋。鶯語湖邊正落潮。惟有別離難忘記。開船時候是花朝。韻字紗題錦字書。燈花消息比何如。歸期愁殺秋池漲。不憶鱸魚憶鯉魚。

官街三日雨淒淒。十丈塵消一斗泥。略似江鄉春去後。冬青花破鵝鵝啼。
冷布當窗碧似紗。濛濛一半有烟遮。不知織錦秦川女。幾處空房聽暮鴉。
書堂斜展北窗新。夾竹桃開露半身。日暮嬌香兩無語。湘夫人對息夫人。
萋菲但有青蠅集。吟喝曾無白鳥羞。長日垂簾宵卷帳。憐蛭見蠅又防秋。郡下多蠅而絕無蚊子。惟蠅與
蜈蚣入秋甚夥。

丁香芍藥都開過。杏子櫻桃價漸平。金剪乍收銅盃響。賣花聲換賣冰聲。

元祐黨籍碑

黨籍碑。乃是蔡京之所爲。搜羅星宿恣謠詠。跌宕日月爭光輝。京爲此碑意何居。書曰奸黨深剛削。以欺
天下不可欺。以疑後世不可疑。但留名姓紀元祐。毋乃董狐陰使之。不然史之闕文不概見。天下後世一
一知爲誰。首列宰相司馬光。武臣內臣王與張。三百九人一片石。此石不入朱勔之花綱。黃門夜半傳玉
冊。石破天驚橫太白。畫圖已滅景靈宮。姓氏仍磨端禮闕。碑雖可毀名則崇。後人此意將毋同。至今價重
洛陽紙。當日流涕長安工。清流居然投濁流。汴州忽變爲杭州。宣和書畫劫灰冷。此紙一拓何人收。黨籍
碑。下中上。往車來軫葫蘆樣。君不見五屬纔收北寺囚。三朝又點東林將。

書桃花扇樂府後

粉墨南朝史。丹鉛北曲伶。重來非舊院。相對有新亭。搆黨干戈接。填詞筆硯靈。匆匆不能唱。腸斷柳條青。

誰耗秋來客。娉婷夜度娘。文章知遇少。脂粉小名香。不解鸞乘霧。真成燕處堂。秦淮鳴咽水。忍與叶宮商。
秋草

秋草遠無邊。秋風颯可憐。愁來何滿地。衰處竟黏天。妃子青三尺。王孫綠一年。無人辭司隸。得句忽淒然。
愛妾換馬

駿馬不常有。佳人難再得。二者孰可兼。使我三歎息。丈夫意氣浮雲開。美人遲暮天馬來。會當短衣馳萬里。安用長袖歌三臺。低鬟再拜與君別。楚臺夢雨秦關月。神仙富貴兩無成。兒女英雄各癡絕。君不見重瞳圍急聞楚歌。烏騅奈何處若何。又不見睢陽城中宴將士。愛妾亦死馬亦死。

法源寺石壇唐太宗廢征高麗將士戰骨處

七寶莊嚴萬骨靈。法雲香接陣雲腥。埋來春草三年碧。開出蓮花一朵青。橫海風濤灰幾劫。諸天鐘梵佛同聽。高臺擬當燕然石。只欠班生勒作銘。

讀穆天子傳一首

風馬雲車玉女觴。知非西母定東王。增城已去三青鳥。荒服何來四白狼。兒女埋香彈有淚。神仙駐景祕無方。甫刑刪後祈招逸。外傳分明似武皇。

雨後再過崇效寺作

寺有菊花時。車馬爭看菊。不盡爲花來。人多花亦俗。或藉宴賓朋。當花陳酒肉。雜坐僧及伶。左右冠帶束。

轟飲充大戶。俚音奏小曲。彼日所見如是。我時乘興來。興盡歸更速。一路替花愁。殆非花所欲。是日西風高。作雨連夜足。晴泥尺許濘。街巷鈔轉轂。弊居與寺近。蠟屐我來復。天寒僧漸凍。霜重花亦伏。不復見其黃。乃惟見其綠。雖不見花黃。頗能媚幽獨。昨日賞花人。誰知葉沃沃。

冰牀行

北風驅水水不動。玉鏡河光連底凍。九門曙色一牀飛。載得千家萬家夢。舊時烏帽黃塵裏。惆悵轆轤知幾許。忽然博得馮夷歡。層冰峨峨碾曉寒。綠波無影紅塵絕。中有雙雙水精轍。非車非馬亦非舟。稱爲冰牀當臥遊。我無百尺樓頭住。牀上牀下兩何處。衝寒自作冰牀行。強似雪車聯險句。

自題冰牀詩後

彈得冰弦曲。詩寒未肯休。鮫人綃箔底。驢子板橋頭。忽作乘桴想。真成下榻留。聲疑來萬馬。力可挾雙輜。玉倚吳宮白。銀憐漢井秋。雲車飄若此。日御冷難侔。列列看城雉。盈盈汎斗牛。踰溝三刻迅。到岸兩錢酬。捷徑分明在。勞薪幾度收。干卿復何事。春水一池流。

柔兆執徐

跋快雪時晴帖戲試帖體得書字

夙有臨池興。曾窺內史書。快哉當雪後。時也恰晴初。爲想傳柑後。應從訊竹餘。恩恩真不暇。咄咄彼何如。

蚓或能憐我。驚寧肯換渠。露垂金翡翠。冰泮玉蟾蜍。修禊期還早。清談迹未疎。硬黃傳舊拓。飛白映匡居。裏鮓痕猶在。飄鷺勢轉虛。宸遊珍古藻。片石列軒除。

火判官歌

十三鐙已上。十四月未圓。十五大歡喜。擡出火判官。判官乃以黃土搏耳。風鼻火春漫漫。笙歌叢裏女兒子。三朝三暮烟未寒。匆匆缺月收銀盤。焦頭爛額興亦闌。郭郎鮑老同一酸。熱官爛熟紅塵乾。飯破不顧灰死不然。一年三百六十夜。必不能夜夜作上元。君不見火判官。

謁文丞相祠

厓山浪花白。燕山血花碧。鬼火陰房五百年。春風又綠銅駝陌。君不見零丁洋中海水飛。又不見萬年枝上挂僧衣。六陵夜月暗於鏡。白骨瘦盡冬青肥。江湖況避錢唐弩。萬竈貔貅自歌舞。降表纔書謝道清。祭文早就王炎午。一歌白雁來。再歌朱鳥化。擊節參軍如意邊。招魂丞相祠堂下。風簷曾讀文山詩。蕭條異代不可支。手擎芙蓉唱青石。曠世之感今視昔。吁嗟黃冠歸未得。花外啼鵲關塞黑。風沙柴市好名聲。香火泥牆古顏色。決眚西峰斜日曛。翠旗欲下雲中君。千秋願奏神弦曲。恨少彈琴汪水雲。

夜半

近市多鐘魚。聲聲曳林越。春愁在被池。短夢破恍惚。搖搖銀海花。峭峭玉山骨。窗際微有光。不辨雪與月。可憐歸飛鶴。夜半猶未歇。

遲徐朝玉不至

鄉思橋頭水。春來碧似紗。鯉魚無一字。燕子傍誰家。遠道淹行李。前期訝及瓜。比隣知己在。無那竟天涯。

朝玉所居。去余家才數武。

隔歲巴山話。青燈占一宵。酒聲隨雨瀉。花氣得風驕。晝會思漁父。春愁付洞簫。城南望城北。冷過百花朝。

瘞笛

蓄此笛四年矣。雅有雲石之韻。墮地絕脫。遂折其半。既埋之牆陰。且做毛西河水盡子銘。作瘞笛詩。

縱二尺餘。圍寸許。中有宮商角徵羽。一朝擲地。金石聲。雄鳳雌凰不相語。憶昔截雲歸笛家。一枝吹破江梅花。年來與我周旋久。錦囊南北隨時走。既不若筇枝九節化作龍。又不若翟竿七尺垂爲虹。紫雲迴奏廣寒殿。昭華瑱弄咸陽宮。但向人間傳一曲。葦綃霏霏貼寒玉。惹得樓中黃鶴飛。吟殘水底蒼龍宿。錯來不鑄六州鐵。猿臂鶴脰楊柳折。合之則美離則傷。兩頭纖纖太愁絕。此時無聲憶有聲。此物無情卻有情。一丸泥當封嶢谷。萬戶侯猶唱渭城。可憐黃竹埋黃土。響絕音沈悄終古。珠墮樓頭玉倚牆。夜深誰按霓裳譜。

王仲瞿至自河間。卽用其去年雨夕見酬詩韻

春來慣聽落花聲。我欲言愁始憶卿。偶爾驅車五陵道。依然折節兩書生。飛蓬身世緣何淺。破甌功名夢

未成。腸斷天涯芳草色。一番消息幾回更。

本來紅豆最相思。種出東風去較遲。笛裏飛殘故園曲。袖中香散隔年詩。淹留時物君同感。消受風塵我獨知。誰遣中間大如礪。迢迢北際與南垂。

當時行李舍相傳。平。衰草黏來各一天。孺子南州仍作客。謂徐朝玉去年與仲盟同於放榜日出都。今聞朝玉滯迹閩中。不果來矣。公孫東閣與招賢。仲盟時記室河間郡齋。酒邊風雨聽如昨。別後情懷記不全。纔過百花生日日。再無惆悵似今年。

回首深宵句鬪誇。流光翻似隙馳驅。烏衣巷口仍飛燕。青粉牆頭又柳花。豈有馬羣空北野。幾因蝶夢悔南華。教坊宮樣新絲買。先織回文寄到家。

與沈小如刺史長春話舊卽送補官保定

識得吳興沈亞之。相逢少似別離時。三生舊雨如流水。兩點春星各鬢絲。宦海君猶書下考。詩城我竟出偏師。思量水月菴中語。此意分明絳蠟知。水月禪林在懶眠。衲衲。曩日與小如言別處。

燕草秦桑行路難。有人捧檄渡桑乾。燒殘春夢三條燭。再踏紅塵兩宰官。令兄巡梅進士。前令甘肅時。小如初罷景州。既而俱以憂去。今小如需次保定。巡梅仍謁選人。下坂光陰風物改。對牀消息雨聲寒。與君折聖論心竟。未作閒愁一例看。

春場結客少年俱。手種丁香一樹無。海上青蠅重歎息。天邊蒼狗亦須臾。余與小如始訂交於虞丈曙軒。

家今處下世已久。而其屋亦再易主矣。蒼狗句。君當自知之。平心肯作彈棋局。回首難尋記事珠。一樣蘆溝橋外月。折枝忍唱古驪駒。

青墩纔賦寓公篇。出見紛華又一年。畫餅真成名士誚。催租猶得故人憐。沈松廬觀察以南華橋老屋借居。門前種樹看楊柳。天際歸舟託杜鵑。恰與鷗波亭子近。幾時來趁釣魚船。

自都赴河間雜詩

春老萬花飛。春歸客不歸。小園啼鳥歇。大道柳絲肥。舞側山香帽。拋殘宮樣機。誰知壓金線。不爲嫁裳衣。驢蹇書三紙。鼇飢餌一竿。回頭偕計吏。空手誚綱官。饒豈紅綾餅。寒猶白紵欄。西川留後在。能勸主人餐。一尺琉璃水。彎環鎖石梁。閒行吟岸柳。古意滿樓桑。帝子金刀後。佳人錦瑟旁。三更茆店月。聽唱漢中王。南指白溝渡。茫茫細草堆。兩朝鴻劃處。一戰燕飛來。鏃向長平拾。圖從督亢開。迴波尋小憩。車馬苦相催。朱履三千客。燕雲十六州。當年木蘭榼。此地蓼花遊。車後塵何限。橋邊水自流。一盤天上月。送我到任邱。歸興空彈鋏。生涯笑捉刀。驪歌三日唱。鶴俸一符叨。姪女鴉頭髻。琵琶鳳尾槽。問渠絃柱裏。可有鬱輪袍。王郎題壁處。欲唱大江東。浪卷千秋白。塵消兩袖紅。殘碑歌伎笑。羌笛酒人空。西抹東塗徧。誰知此曲工。見旅壁有仲瞿孝廉題念奴嬌詞一闋。最工。

臥槐圖倡和詩引爲韋靜山別駕協夢作

河間郡齋西偏有臥槐焉。昔爲雷轟。今成風景。春華秋實。晝聶宵炕。於時靜山先生棄半刺之官。

作數句之客。生鄭草於絳紗帳前。種庾蓮於青油幕底。仲文儒雅。感搖落於東陽。子雲連蹇。賦青
蔥於玉樹。爰吟五字。遂成郢客之歌。併寫一圖。乃有王郎之筆。仲聖寫圖。蓋桓子之十圍。即曹公
之三市也。僕蜥蜴行來。忙慙舉子。顛隅躍後。始得參軍。對此守宮。況余下第。欣然讀畫。率爾操觚。
昔者王祐發蹟於三株。李石徵祥於七鎮。牽牛可見。訪卜肆之枯查。臥龍有靈。傳祠堂之老柏。而
乃買山錢少。種樹書亡。十年之計未成。三舍之陰可惜。猶復銜泥巢屋。覓句閉門。一覺珠簾懷風。
前之豆蔻。半炊磁枕。寫雪裏之芭蕉。爲新豐折臂耶。爲彭澤折腰耶。爲北窗之羲皇耶。爲南陽之
管樂耶。此樹固非大安國。吾輩終成渴睡漢耳。是用據蓄念於朽株。託深情於豪素。潛淵驪夢。敢
壓元白之詩。細字蠶眠。竊附丹青之引。

東閣招賢地。南柯紀夢人。偶吟枯樹賦。忽現宰官身。張緒三眠老。袁安一徑貧。蕭晨開戶嬾。青女尙橫陳。
絲竹都堂夜。高眠定不知。疏添右丞畫。忽入左司詩。風雨催殘後。烟雲供養時。十年春夢覺。惆悵杜分司。
才大難爲用。功成不受償。折腰無一飽。抱鄴且三商。似有將軍坐。空憐舉子忙。經旬看鼠耳。鬱鬱督公堂。
冰雪孤根出。風塵小劫平。萬花黃不埽。一院綠無情。此樹婆婆意。當年霹靂聲。丹梯三十級。真訝到蓬瀛。
樹左欹設紅梯二承之。

書碧血錄後記明楊左六君子被逮事不著撰人姓名但題燕客二字

鐵鎖風香玉馬飛。沙蟲猿鶴黨人碑。誰爲孝子忠臣者。直到天荒地老時。花裏子規啼有血。山頭廷尉望

無期。分明大有扶風客。橐筆紅塵那得知。

古意四首戲寄海珊

一樣吟魂兩樣銷。新人咫尺舊人遙。爭傳西曲歌中婦。未許東風鎖小喬。何處然犀求玉鏡。又看騎鳳奏瓊簫。多時隔著同年面。覓箇癡蟲細細雕。

華年錦瑟繡囊空。五十朱絃續斷鴻。叢菊黃憐他日淚。桃花紅記此門中。定知讀易占歸妹。不用裁詩費惱公。轉爲風姨思月姊。誤人靈藥廣寒宮。

居然琴瑟似琵琶。謗及歐陽且漫論。庭雪解圍吟柳絮。江風打槳見桃根。金車憶合春遊隊。紺袖猶餘舊睡痕。牢記芳名第三子。青谿白石蔣侯門。

乘鸞烟霧卷衣裳。卻扇重催子夜妝。楚國姻緣繩息媿。邢侯眷屬得莊姜。相思紅豆生南國。獨立佳人自北方。絕勝段家橋畔路。竹枝聲唱野鴛鴦。

仲瞿再試禮部報能將歸意不自聊。乃乞河間公多作書致江東諸大夫薦爲醫公既許之而皆余爲屬稿幾蒙閭匾之誚。忽憶東坡有言。學書者紙費學醫者人費。然則爾我將分任其咎乎。相與喟嘆。仍爲三絕句解嘲。

讀破靈樞一種書。杖頭從此挂葫蘆。不知被放年年去。消得文園渴也無。不須瑤草勸龍畊。何必華芝采鶴齡。願得紅紗雙眼豁。人間何處覓空青。

折肱可似嚴三點。妙手無過溫八叉。累我封題頻咄咄。費人費紙各擔差。

題仲瞿金陵贈謝玉孃詩後

玉女紗窗枕水開。夜深鐙火下樓臺。生憎名士癡無福。難得佳人冷愛才。緩帶輕裘誰忍俊。亂頭麤服又呼回。一聲檀板干何事。莫喚分司御史來。依然王謝姓名香。半巷烏衣古夕陽。夢好靜堪三日憶。情深遲待十年償。贈珠還後吟雙淚。獻玉歸來舞一場。牢築詩城千萬雉。莫教消息過東牆。

九日蒲縈臺

憶昨追涼綠槐夕。青蟲飛上鐙花織。解衣脫帽未渠央。蒲葵十萬風無力。爾時盼秋秋不見。誰信秋來剛一箭。髣髴飛殘寒兔溼。初七纔過又月半。金風玉露不論錢。滿城雨灑重陽宴。悄然冒雨臨高臺。心感年光客裏催。若教此雨催作雪。又有梅花無數開。

明石砧宣撫女士司秦良玉畫像歌

銀鐙夜袞雙寶刀。蠻韉十隊芙蓉塵。酒酣不作絕纓戲。紫電橫掣將軍袍。詰朝殺氣屯四野。美人飛上桃花馬。白草青燐古戰場。春風一面何人寫。匆匆碧海揚黃塵。以帚以箒空酸辛。世間不少奇男子。天下偏多美婦人。凡土官家法調兵。急則以箒。曰能飯者畢至也。再急則以帚。曰掃境出也。

先祖檢討公嘗作摩訶菴杏花詩都下一時傳誦後山陽程魚門晉芳編修於壬申歲過菴則爲棗

花而無杏樹乃賦一絕感懷近見烏程戴蕲塘太常藤陰雜記及此事而未錄先祖詩位檢試墨齋遺詩中祇有重過摩訶菴杏花七律一首殆卽是也一花開謝何關重輕自經題詠便有情緒既感家世因賦一篇并補錄前詩以爲緣起太常昉竹垞舊聞摻羅幾垌詩蹟當有取乎此爾先祖詩云花發誰能認舊枝曲欄深處我曾知二年蹤迹同遊少三月風光再到遲莫遺壺觴虛後會已輸蜂蝶識前期嫣然一樹留人久又是黃昏欲去時魚門先生詩云玉堂仙客題詩處古剎離離放小紅三十年來人事改棗花香細月朦朧

鶯花記得郊西寺還署摩訶菴舊字東風撲面詠花人花落花開一再至花下詩成花外傳琳宮佛對玉堂仙壺觴裙屐映先後二十四番三十年年去年來難駐景杏花茫茫棗花冷他年我若訪摩訶今之視棗昔視杏

餅水齋詩集卷六

疆圉大荒落

二月一日僧王疏雨備兵朝梧自燕入黔錄別三首

春來纔一月。我去忽萬里。萬里亦有春。人心不相抵。梅花送我行。冷向道旁俟。芳草漸有情。一路隨行李。迢迢風塵中。鬱鬱車馬裏。夕漏招蝶眠。曉飯先鴉起。刀鐔且自看。車輪未能捉。借問何所之。白雲滿山岨。去則爲春糧。來則爲負米。

拊髀髀有肉。買馬馬無骨。鐵笛作羽聲。吹上關山月。月白天如霜。照見金銀闕。一箭落句始。使我興飛越。平生行路難。南北東西蹶。去亦行遲遲。急則計咄咄。功兼助游覽。道頗絕干謁。蓬矢與桑弧。誰能坐蕭杌。可憐杜牧之。十里珠簾揭。

石生與溫生。三復河陽序。芙蓉汎綠水。矧乃謬相許。自從車班班。數錢逢姹女。書劍竟從軍。春原嘯疇侶。五谿接八番。天外多風雨。回首黃金臺。何處飛鴻羽。勸君陽關疊。酒盡聞金縷。叱馭有王尊。倚馬非阮瑀。恩恩唱驪歌。閨閣作蠻語。

定州

楊柳添聲第幾關。清風明月古中山。酒家故事誇千日。樂府新腔唱兩鬟。數點鴉隨殘照去。一鉤草認舊根還。春愁正要逢場寫。到處奚囊未肯刪。

樂城道上作卻寄張九秀才溥雲

車馬慙東風。塵沙怒相語。隨風飛上天。無萬下紅雨。紅雨不溼人。染我春白紵。相思一寸灰。厥貢五色土。雜糅洩勃苓。鼻觀口欲吐。蕭蕭短後衣。裊裊長柄塵。隱隱見孤城。匆匆飯亭午。頗憶江鄉春。烟水幾枝鰲。乃知別北梁。不若送南浦。

杏花

已有杏花開。東風昨夜催。出門雙眼瞽。隔屋一枝纔。酒竟誰家熟。春偏此地裁。分明鬢上見。當作阮娘猜。可惜天涯客。三年嶮巇中。蕭條臣馬白。惆悵此花紅。深巷吹簫遠。孤邨蠟屐空。再遲三四日。蝴蝶一叢叢。

趙州道上逢雨過憩雨花菴卽事

以風吹塵塵似海。以雲作雨雨如水。陰晴掌自玉女天。雨妾風姨不敢譏。我住下界紅塵迷。馬不及狗車雞栖。昨日之塵輒猶土。今日之塵爛作泥。願晴無風雨不溼。或者斜陽及明月。一車兩馬五七言。吟入西南出水窟。玉女聞言俯而笑。晴雨那能從所好。況是燕雲十六州。畊田事急吟詩料。依然帶水拖泥行。油衣代瓦滑有聲。忽露茆菴剛一角。恰逢花雨亦三生。布衫七斤重如許。菴中雨花菴外雨。花卽是雨雨卽花。我來說法逢天女。老僧一椀趙州茶。鬢絲禪榻恒河沙。碧紗籠裏雨非雨。青蓮座上花非花。

古常山郡弔蜀漢趙順平侯

同仇可以辨國賊。同姓可以辭國色。卽此豈是尋常人。子龍不獨膽一身。燕南垂。趙北際。執手而別知此意。大震長坂名。小失斜谷利。早經百戰上青天。直爲三分悲白帝。侯如前守土。荊州未必呂蒙檣。侯如後永年。陰平未必鄧艾甦。侯今零落歸山阿。某水某邱故里過。千秋灑淚誰最多。請君視此潯沱河。

隆興寺大佛

入門何爲怪咄咄。眼前突兀見此佛。丈六金身十倍之。大千世界一塵不。見軾旣載僑如眉。專車尙陋防風骨。楚莫敖趾不足高。李洛姬肚無此凸。巨毋霸腰凡幾圍。徐偃王筋若干抹。王元寶絹作三衣。尹吉甫鏤抵一鉢。仰視翻疑屋打頭。橫陳但可窗容鄰。玉井十丈花可拈。金剛八尺食可乞。旣非肉眼與凡胎。定是銅頭而鐵額。豈知枯木倚寒厓。再燒幾尊乾屎橛。

內邱鵲山山因扁鵲名

占得荒山作故鄉。藥囊香墮入詩囊。陰陽功補先天缺。草木靈開後死亡。一病難醫惟有俗。百年太短竟無方。相聞風起蕭蕭處。白到先生墓上楊。

臨洛驛館偶題

洛水曲相繞。其原出遼州。奔騰太行麓。晝夜無時休。我車方西征。此水自東流。水豈無情者。我行何悠悠。古驛暫栖息。御者不肯留。驅塵非所願。臨淵譬有求。不見水中魚。但見水中鷗。鷗飛忽驚去。沙岸車聲柔。

呂翁祠

員海方壺路渺然。當時何苦便酣眠。三生香火春無主。一枕功名夢有權。黃犬東門牽將相。紅牙北里唱
嬋娟。恩恩輪與樊川杜。豆蔻梢頭住十年。

宰相紗籠一飯餘。秀才文選半飢驅。本來富貴原如夢。未有神仙不讀書。場屋謠言成脈望。洞天眞語入
華胥。槐花忙過榴皮溼。賺得英雄證太虛。

磁州講武城疑冢行

有手不執五色格。有口不讀九錫文。有酒不澆七十二堆纍纍之疑墳。七十二墳盡銷歇。黃土無多況白
骨。縱然老是鄉。何用狡爲窟。君不見銅臺百尺鳥呼風。石椁三年狐拜月。可憐兒女分香時。乾啼溼哭長
相思。朝來欲獻西陵寵。未識招魂第幾冢。迷樓本自迷。疑冢亦自疑。漢家陵闕日猶冷。魏國山河草不萎。
或言阿瞞設計愚人耳。彌天一棺不在此。豈不知奸骨有時朽。奸魄到處褫。奈何不殯殯落落以生。而寂
寂寞寞以死。死不能夢三馬。生不能鎖二喬。一世之雄一抔土。雖有魂魄何足豪。有手願搗禰衡鼓。有口
願讀陳琳檄。有酒去澆八十萬兵。不得生還之赤壁。

安陽畫錦堂故址

畫錦堂成歸故鄉。仕宦能作邦家光。長安居亦大不易。豈如相州畫錦堂。我過畫錦堂前路。不知畫錦堂
何處。本無絲竹願東山。不隨社稷稱南渡。季子洛陽雞狗雄。翁子會稽負情儂。燒殘丹詔九天上。吟老黃

花一圃中。安陽道上。逢殘照。重公之人爲公弔。祇知將相是難能。誰恤子孫有不肖。永叔文章自可傳。君謨波磔更翩翩。累他紅錦飛花客。老撰南園記一篇。

湯陰謁岳忠武王祠

孝子忠臣地。相逢淚滿巾。中原留間氣。尙論得完人。烏鳥三年志。黃龍百戰身。英姿豈磨滅。俎豆自莘莘。昔作西泠客。孤墳拜鄂王。今尋東道主。故里認祠堂。鐵鑄階前錯。銀留井底香。老兵堪痛飲。絕似蔡中郎。勞墾施全。

只解春浮海。誰呼夜渡河。視天真似夢。割地竟無多。窗下妻方煽。宮中姪請和。可憐三舍日。揮斷魯陽戈。載讀公遺集。丹心照汗青。功名違抗疏。文字抵傳經。短者英雄氣。愁來筆硯靈。滿江紅一曲。愴慨不能聽。祠主係忠武。後裔奉祀香火。出忠武文集相贈。凡軍中表奏文移。及所作雜文詩詞。皆在焉。

殷三仁祠

微子作客箕子奴。比干心血紅模糊。三人行事不相類。令我贖世長嗟吁。殷王壑谷飲長夜。遂賜天下三日醢。孟津諸侯乘醉入。鹿臺散財償酒逋。畢榮望夷功佐命。飛廉善走殺海隅。三仁斯時奈何許。或生或死風景殊。微子懷中抱祭器。箕子口內談洛書。比干墓木拱馬鬣。雖欲傷心心已無。東山祿父初發難。實惟管叔相覬覦。頑民不隨九鼎徙。義士況使三軍扶。當年心迹信無異。後世口實繁有徒。朝鮮一舸自縊縋。旌夏一舞空支吾。荒祠儼然傍故土。甯知故土爲殷墟。老臣不願見此事。回車去式商容閭。

碧桃曲

爭將殘月唱楊枝。瞥過東風賣杏時。三十六天春露重。碧桃花底話相思。最關情處易銷魂。紅翠霏霏映此門。我是隨藍風裏客。看花先感種花恩。

浣衣里過嵇侍中祠

東市琴聲二十年。司徒題目祕書箋。酒壇幾向黃公醉。衣袖仍留碧血漣。此後難尋絲竹譜。有人早廢蓼莪篇。侍中還我何相似。問訊官蛙一惘然。

陳橋驛詠史

兩日摩挲一日紅。當年此際太匆匆。病龍臺遠名成讖。夾馬營香氣早鍾。遂有高文用陶穀。竟無佳傳贈韓通。可憐夜半爲天子。難守庚申漏點中。

渡河

水響一舟虛。春風吹鯉魚。驅車上土堰。破浪出河渠。帆影斜陽外。沙聲落雁初。祥符城郭近。方便幾行書。夷門懷古

市塵卑騎兩情通。臥榻兵符半夜空。六國輸贏歸婦女。一關開閉老英雄。頭顱血有酬恩日。肝膽交無折節風。若鑄黃金買絲繡。西園公子此門中。

汴梁尋宋故宮遺址

踏破宮牆萬瓦烟。夕陽紅似靖康年。欲聽簫鼓空流水。更指榛蕪作弄田。彼黍茫茫乾淨土。此都渺渺別離天。金牀玉几無消息。一角靈光尙宛然。水潦中露殿兩楹。螭吻猶在。

當年鎧火下樊樓。忍把杭州作汴州。橋上鶉啼新法變。江邊馬渡舊京收。石欹艮嶽天難補。簾颺離宮鬼自鉤。一事輾轉惆悵甚。宜和書畫不曾留。

洛陽貴紙寫三都。爭似千金買諫書。報國將軍歸北寺。移家天子占西湖。畫船晴雨花深淺。絕塞冰霜雁有無。此是橋山弓劍地。不堪飲器用頭顱。叢殘史冊小朝廷。彈入吳弦不耐聽。湖上春寒天水碧。帳中酒熱帝衣青。班師快快三軍雨。攬轡迢迢一使星。賸有寒簾黃袖子。相州樓上話飄零。

潁橋

今之潁橋古潁谷。我思古人潁考叔。九原惆悵讀春秋。一飯從容全骨肉。計惟掘地聊解嘲。力比回天更足豪。諫諍差同漢方朔。擬人不類秦茅焦。至今潁水清且泚。不似黃泉大隄裏。可憐城上取鰲弧。自古忠臣必孝子。

過保安驛作

爲有紅娘子。能行白牡丹。已聞哀楚些。直欲絕秦歡。設險中原地。防邊上將壇。浮雲能蔽日。獨此不撫欄。忽棄三千甲。仍傳八百郵。兩言執牛耳。五等爛羊頭。大將無去病。佳人有莫愁。蕭娘與呂姥。迎送幾時休。

此地馬箠數。前宵狐火鳴。春聲歇朝露。燐影亂春星。烏合真無賴。鴻嗷未忍聽。可憐丞不負。誰寫抱關銘。
縣丞張煥。巷戰死難。

襄城見月是夜作家書附題於後

亂鴉選到斜陽樹。去向襄城縣中住。昔年獵火詠詩人。欲覓遺蹤竟何處。韓文公有夜次襄城詩。是爲裴晉公行軍司馬時作。且攜茆店鐵鐙檠。鐙影徘徊月影明。若憶鄆州小兒女。誰知今夜宿襄城。

王孝子篇

孝子名希曾。葉縣人。與父渡清潁。顛風覆舟。同渡者盡溺。孝子從水底負父至岸。力盡衝浪死。父得免焉。有碑在葉縣西三十里大路旁。知縣楊元凱撰記。余秣馬問渡。作王孝子篇。

清潁從西來。流何湯湯。南岸北岸。乃欲濟而無梁。一解。無梁有舟。放乎中流。以左右望。有若風馬牛。二解。舟小兮人衆。風之來兮。頃洞欲去。不得去。一壺千金。上下如夢。三解。嗟嗟孝子。負父上岸眠。父出於泉。子入於淵。子身雖死。父身存。無情者水。有情者天。四解。天能死孝子於水。而不能死孝子之父。維孝子之故。嗟嗟孝子。公無渡。五解。

過沮溺耦耕處

攬轡登車客。澄清何處期。畊田人自耦。失路數偏奇。名姓終難隱。津梁亦久疲。黃城山水下。逝者竟如斯。
會水橋漢光武帝廟

橋邊白水真人廟。城外青山帝子鄉。杖策何人來北道。握符從此起南陽。兩廊星宿鬚眉古。一劍風塵俎豆香。熟讀東西兩都賦。始知世祖勝高皇。

會水道院看花林鍊師煎茶相款漫書其壁

有此清涼境。相逢支遁家。遲行三里路。細數一房花。石古懷琴韻。甌香咽井華。真成殺風景。疥壁又烹茶。一春車馬熟。塵事厚人顏。肯受諸天笑。仍偷半日閒。過橋剛聽水。去路更看山。未忘題名處。星軺慣往還。院壁有茅庶子耕亭集杜題句。諸天合在藤蘿外。懶性從來水竹居。又洪編修稚存與道士林克敬小篆書一聯。與師記作三年別。此地能容半日閒。兩先生皆督學經此。庶子則爲余癸卯薦師。因寄懷云。

午後發新野縣迷路夜行至樊城則雞唱矣

驅車日亭午。岐路自東西。野色空無著。浮雲晚更低。亡羊徒悵悵。老馬亦栖栖。何處逢茆店。涼燈聞曙雞。臥龍岡作

到此橫拖一道岡。茅廬開出古南陽。平生交有崔徐在。王佐才非管樂當。抱負終成名士累。鞠躬始感受恩長。何如決計招僭隱。廬下分明有孟光。

談笑巾幘想定軍。茫茫玉壘變浮雲。其間王者有名世。天下英雄惟使君。創業自知難兩立。輟畊早已定三分。成都八百株桑樹。不及隆中手自耘。

一面東風掃舳艫。荊襄形勝控成都。昏姻失意千金賞。兵法傾心八陣圖。受禪壇高終代漢。橫江鎖斷并

忘吳。不堪白帝城邊語。付與先生六尺孤。

象牀寶帳悄無言。草得降書又幾番。兩表涕零前出塞。一公安樂老稱藩。祠官香火三間屋。大將星辰五丈原。異代蕭條吾悵望。斜陽滿樹暮雲繁。

峴山羊太傅祠

將軍閣下碑無字。太傅祠前草自春。雙淚不如臺上伎。一山愁殺眼中人。盛名王衍回頭誤。祕計張華斂手頻。獨立微吟整巾帶。酹公酒當飲公醕。

轉斗灣

舍車理烏榜。樂事紛相關。低頭看春水。舉頭看春山。山容既窈窕。水聲亦潺湲。謝累塵土裏。得助江山間。十里復五里。好景不可刪。一日或兩日。好事不可攀。榜女十三四。倚棹雙烟鬟。問訊泊何處。云是轉斗灣。舟行望襄郡。諸山作

一桁。青山青到水。水上青山在水底。山耶水耶相與浮。千里東風蕩船尾。東風吹山山骨瘦。水面之山山面皺。以水作鏡山作人。雲鬢霧髻梳青春。問山何名。山不答。水水山山自相接。一山分作兩山看。兩水環成一水合。蒼茫山水萬重重。魚鳥雲沙空復空。忽地斜陽挂西嶺。浪花開出金芙蓉。

石鐘村

舵樓花雞啼月黑。船娘夢醒桃花國。開船滑笏水有聲。柔艣一枝劃春色。我坐襄陽下水船。船自開時我

自眠夢遲水急船搖去。昨夜匆匆泊何處。依稀記得石簾邨。吳頭楚尾銷人魂。他年此地重來覓。祇有邨名無夢痕。

丫髻廟

江邊丫髻廟。標榜暮揚舲。斜月一梳白。烟螺兩岸青。夜深山影重。魚響浪花腥。未定今宵泊。吾方注水經。

梁元帝祠

賽社春叢字認梁。江陵城外永安坊。夢無采女中懷月。醉有徐妃半面妝。木偶神情投筆早。土囊故事引杯長。南朝金粉飄零盡。腸斷湘東一瓣香。

更誰回首望臺城。下策虛傳討賊名。入廟牲醴難供養。升天鱗爪太分明。奸雄乘間欺臣節。骨肉摧殘藉寇兵。留得哀江南一賦。暮年蕭瑟庾蘭成。

沙市是章華臺故址

昔日楚王臺。今日楚人市。一如未築臺。但有此臺址。惟見市中沙。日日因風起。

曉雨荊州渡江

息壤南門勢渺漫。抽帆風雨曉天寬。銅鞮曲散襄陽樂。玉壘雲橫蜀道難。潮打沙聲衝岸急。鳥飛山影隔江盤。由來青雀黃龍舳。何止芒芒感百端。

劉表

迢迢帝系圖。袞袞鉤黨籍。戀戀據方隅。悠悠處房室。作牧二十年。進退無一策。養士三千人。生死無一客。尙遜袁本初。豈敵曹孟德。同時燕南瓊。後世湘東繹。矧是豚犬兒。去梯亦何益。然而孫仲謀。畢竟加九錫。

澧州道中

借得漁燈讀楚辭。孤篷便有雨絲絲。十年香草天涯夢。今夜重來唱竹枝。暮雲無際楚天低。林木蕭蕭響竹雞。聽出一聲行不得。黃陵秋色滿湘西。月出空江白玉盤。數峯了了青雲端。分明一樣山河影。難得才從雨後看。襄陽去此一千五。換屢荆船第四回。水漸無多船漸小。吟成摺疊侍郎來。夙愛陶公太元記。曾題仇氏武陵圖。豈知身到秦人洞。萬點桃花一點無。

綠蘿山

四十二福地。相傳在此間。不知青玉笈。何處綠蘿山。花遠仙無迹。春深客未還。竹枝聲宛轉。唱徧武陵蠻。

舟泊穿石

兩山拱而立。一洞明且秀。諒非鬼神鑿。亦無仙佛守。青削天體圓。冷咽泉花溜。我船泊洞左。所見徹洞右。隱隱遠人邨。褰裳莫能就。虛室候雲歸。深潭許月受。晴喧一瀑飛。空納萬風吼。洞裏旣黃昏。洞外仍白晝。游基蹲甲射。七札皆穿透。靈媧開鑪煉。五色難補湊。作此大光明。天地分一竇。俗境陋桃源。古蹤閤勾漏。我思訪奇書。夜夢靈威授。三復瑯嬛篇。牙牙難句讀。

麻葉泐阻雨三日

山雲夜挂白龍影。朝來雨絲如斷綆。一尺之雨二丈水。撐我孤舟到山頂。急尋石筍纜孤舟。蓬背淅淅聲未休。隔篷一笑聞人語。昨夜山頭賣酒樓。

楚山旣無名。楚雨亦無晴。夜夜山頭泊。朝朝看雨落。三朝三暮見黃牛。長年與客同一愁。愁說滂沱月離畢。今日不出明日出。百丈山頭猿鶴巢。千尋江底蛟龍窟。

溼帆沉沉愁一束。兩槳苔苔眠靜綠。東船西舫各連檣。風水相遭互相觸。風蕭蕭。雨淒淒。行不得。鷓鴣啼。鷓鴣不啼天又暮。明日天晴無絳路。

清浪灘

一纜萬牛迴。舟從水底來。谿聲驕作雨。人語亂成雷。猿嘯青楓樹。龍眠白浪堆。思量湖上棹。春鏡綠奩開。過清浪灘。驪舟謁馬伏波祠。

楚國山川漢將營。蒼然廟貌感長征。玉關死羨封侯入。椒壁生塗列宿名。下澤乘車言有味。中流擊楫水無情。武陵風月誰吹笛。我是當年爰寄生。

龍門灘

萬峯穿虎穴。一水抱龍門。風長篙無力。船危石有痕。上游爭片羽。捷徑得孤邨。出險真如夢。波濤難具論。夜抵白溶。

放棹白溶裏。迢迢欲問津。亂山天外夢。怪石水中人。側耳聽風雨。低頭託鬼神。然犀思一照。恐有老魚瞋。

辰州

城郭全臨水。人家卻傍山。洞天開二酉。戰地入三關。節物將過夏。方音逐漸蠻。相逢欣撤戍。結隊唱刀鐮。時撤減防禦。鎮守鄉勇。

壺頭山弔伏波將軍

將軍南征立銅柱。我到將軍銅柱處。將軍既出五谿蠻。我亦憑弔壺頭山。嗚呼將軍今老矣。長者家兒怒不止。明珠薏苡無時無。千山萬水將軍死。將軍之死長太息。生據馬鞍死馬革。招魂一曲武谿深。嗟哉武谿多毒淫。將軍莫怨武谿瘴。武谿今有將軍像。將軍血食壺頭山。絕勝雲臺四七將。君不聞山前山後千灘聲。都爲將軍鳴不平。

澱浦江

澱浦江邊船泊時。丹山碧水石壁鏤。此四字可題詩。依稀此景吾曾見。三丈鵝谿黃大癡。

黃獅灘

灘險說黃獅。孤舟欲上時。點頭逢石丈。揮手送篙師。賦命雖然薄。行歌未肯遲。馮夷如解聽。一浪一篇詩。

再上黃獅灘作

我聞弱水西。縹緲三神山。不愁船不到。但愁到輒風引還。風引還不可攀。一海外。一人間。人間何處行路。

難請君再上黃獅灘。黃獅灘高高於樓上屋。水聲如霆。水勢如瀑。舟從水踵到水頂。黃獅眈眈怒以目。長繩繫灘石。巨杙楸灘岸。一步一相呼。才及灘之半。募然一落千丈強。人聲水聲無宮商。紙錢祀神風力駛。摩挲者三鐵鹿子。斷布猶堪三日徇。夾舟終遣雙蛟死。呼蒼兕。騷翠虬。渡香象。歌黃牛。騎鼉掣鯨碧海流。平生豪氣橫九秋。忽聞河東一聲吼。驚走談空說有拄杖之龍邱。吁嗟綱鋒不可犯。孫郎容貌曹公膽。

洪江洞庭宮作

金釵叩樹玉璫熏。一點靈犀翠浪分。昔日書生來北渚。至今帝子望南雲。神弦曲奏紅絲瑟。龍女花開白練裙。手折芙蓉吟別傳。洞庭宮拜洞庭君。

竹濛夜泊聞杜鵑

問鳥家何處。聲聲勸我歸。天涯同作客。夜半忽沾衣。竹暗水無影。山深雲自飛。杜陵詩思苦。得句不能肥。不如歸去好。歸去亦無田。淚比湘江竹。聲非蜀國弦。可憐鵲三市。何處燕雙眠。從此泊舟處。先尋無杜鵑。

沅州書所見

長橋一里臥晴虹。虹背人家兩岸通。絕似秀州門裏見。樓窗開在水當中。綠垣一帶掩雙扉。也有輕黃蛺蝶飛。碧杜紅蕖無處覓。一鉤新刺野薔薇。

玉屏山看晚霞

水上屏山山下池。暮雲樓閣映參差。中間一抹紅霞影。小李丹青小謝詩。

青谿

小縣天南近。輕舟拍拍來。城依山勢轉。花聽水聲開。古道烟少。微波鷗鷺猜。難尋雲客宅。石壁綠封苔。

雞鳴關

眼前何突兀。欲唱小重山。掩映黃茆屋。周遭碧玉環。可憐飛鳥外。何事馬蹄間。客豈狐裘者。平明出近關。

吉祥寺弔甘尙書作

公諱文焜。遼東人。康熙十二年爲雲貴總督。吳三桂反。公致書貴州提督李本深。慷慨數千言。約共禦禦。而本深以安順應賊。公知貴陽不可守。時總督駐貴陽遂馳下鎮遠。殺其妾以饗士。冀招楚兵扼隘。而副將姜義先已從賊。諸營響應。公知事不可爲。乃自縊於吉祥寺。事聞。贈兵部尙書。賜諡忠果。

碧血萋萋草又生。吉祥山下想南征。稱王莊蹻終無賴。殺妾張巡更有情。白練至今飛破寺。蠟丸空憶下孤城。令威歸去遼東鶴。一杵霜鐘萬里清。

登青龍巖絕頂憩觀音閣遂至妙塢

危峯刺雲雲壓峯。一峯游戲如一龍。宛然上下相角逐。山青雲白無人蹤。阮公著屐知幾雨。忍對好山坐惆悵。捫蘿突兀上龍背。亂石之而屹相向。再從龍腹游。陰洞穿覆盎。低迎百草滑於苔。暗瀉一泉聽作浪。轉尋林薄得小橋。盡棄龍爪排龍腰。青泥盤盤不知凡幾曲。山花山鳥向我紛招邀。有僧絕頂聞剝啄。招

客開門上龍角。飛來香雨梵王宮。三十三天無一握。斜陽脈脈雷殷殷。既絕徑路通風雲。低眉欲參觀自在。一鱗一甲皆前因。卽今乘興題詩路。山下烟霞山上霧。親向龍沙八百來。無人知道恒河數。

相見坡

南山北山中央谿。行人隔霧相招攜。對影聞聲忽相見。來者自東去者西。飛梁庚庚橫紫霓。地地矗立天低。上爲星辰下爲石。左顧右盼空所翳。初攀孤藤臂使指。再躡絕磴膝及臍。山風卷裳烏無迹。置身已在青雲梯。君不見黃金絡馬頭。白鐵鑄馬蹄。到此躊躇不敢騎。青鞵布轆行栖栖。我歌君聽淒以迷。一肩壓瘦詩囊奚。

施秉道中

覓得雲根五漏泉。宮商一部意泠然。水經箋注茶經帖。恨不攜來此處煎。梔子花開四面風。山坳蝴蝶草根蟲。無人解贈同心者。亂插紅藤笠子中。沙坪西去是偏橋。幾縷炊烟接市梢。今夜定尋山店宿。夢魂猶趁木蘭橈。

華嚴洞

陰壑固莊嚴。端坐石大士。旁列阿羅漢。面目各宛爾。鬼斧所鑿修。山靈不敢齒。想當說法時。頑者點頭是。采入轉窈窕。仄徑容尺咫。流泉淙有聲。兩屐於是止。假設略約游。異境探更駛。天公慳幽尋。所獻僅有此。

天梯行

層巒陟晴旦。浮光盪朝霞。丹梯三百級。縹緲迴雲車。昔聞地去天。俯仰九萬里。踴胎不能階。羽翰凌風靡。又傳河源客。親見當窗織。乘查暮歸來。取得支機石。二說難信疑。忽見上天梯。權奇策天馬。膈膊聞天雞。徑此盤旋上。天際眞人想。一點高一層。開門跌蕩蕩。碧落接太虛。中有紅雲居。初投蓮花驍。玉女粲擗揄。問君從何來。茗亭黃金臺。身無神仙骨。安能窮九垓。西望蓬萊島。靈藥多於草。讀罷山海經。不見三青鳥。石棧相鉤連。行行夢遊仙。蒼蠅笑下土。一瞬三千年。

七里衝

黃平道上山四壁。遠近高低萬堆石。當年豈有愚公移。此境渾疑巨靈擘。橫看成嶺側成峯。陰慘陽舒天氣隔。山頭風雨山腳晴。晴山蒼蒼雨山白。筍將而來七里衝。居民猶話楊應龍。二十七營何處是。雄龍雌鳳空山空。楊應龍妻田雌鳳。尤妖猛。梅花鼓角山名。城西郭。客到城門日。衝關莫指宜娘舊。日屯將軍昨夜旄頭落。

飛雲洞作

白石三生話。青霞萬里心。偶聽流水暗。不覺入山深。佛坐玲瓏岸。花飛窈窕林。因過月潭寺。空翠溼衣襟。

重安江雨渡

重安江口綠烟生。飯訖江頭打槳迎。著一漁蓑渡江去。果然三日雨無晴。天無三日晴。地無三里平。黔諺老君關。

江上萬重山。山高水更潺。忽停孤客棹。直上老君關。石滑斜通騎。林深溼坐鸞。稍聞雲霧裏。樵子唱歌還。

墜馬石歌

墜馬石者。明巡撫都御史姚啓盛行部。憫夫役之勞。屏輿乘馬而行。此其墜馬處也。土人銘公之德於石。以爲遺愛。在楊老驛官路傍。

墜馬石。雞場路。大書深刻墜馬字。云是前明黔撫姚公墜馬處。黔山高。役者勞。上山復下山。跬步俯仰如桔槔。公爲民牧。愛民力。騎馬登山墮山石。噫嘻。馬足尙難停。何況肩承踵接重行行。君不見驅五丁。鳴八騶。坐者樂。行者愁。石頭路滑風雨秋。燕然之銘無人修。墜馬石。心悠悠。

黃絲驛題壁

一宿黃絲驛。荒邨絕市喧。山虛孤月朗。天近衆星繁。魯酒酌深夕。疎燈搖斷垣。他鄉情緒劣。不必有啼猿。

鳳凰石

鳳凰山上石。勢作鳳凰飛。修竹環青嶂。孤桐引翠微。秦鸞朝又暮。湘燕是耶非。卻借浮雲白。飄飄作羽衣。

冠山寺

龍里東門路。崎嶇復幾盤。寺荒傳法少。山僻得名難。貝葉翻茆屋。松花墜石壇。蒼烟來暮色。雙屐悵盤桓。

抵貴陽日作

驛心常羨義舟師。一錫天南住幾時。客久漸忘行路遠。夢回稍覺到家遲。未愁海上秋風起。先寄山中夜

雨詩。十萬炊烟吟徧了。今朝親到武侯祠。

黔靈山色翠烟堆。樓殿參差入望佳。跋扈將軍曾駐節。風流太守與磨厓。石肝太守陳奕禧。翠窠書黔靈勝境四字。苔藏積溜黏迎屐。松卷天風響墮釵。恨不愚公移此去。青山雖好是天涯。

七日山程自捫當。半年烟景寫遐荒。銀環夾路逢春女。銅鼓傳家賽夜郎。雨後光陰翳簪合。風前滋味野花香。舊遊若寄章江夏。那得新詩爾許長。

百蠻風俗接三苗。紅暈檳榔綠暈蕉。濟火祠前烟漠漠。奢香驛底路迢迢。蘆笙吹月花如霧。茆屋臨谿樹當橋。絕代輜軒誰采得。岑山孖水亦風謠。苗以山之高者爲岑。水分流曰孖。

甲秀樓諸葛武侯祠

若不南征竟東走。蜀道雖難不可守。侯豈真無應變才。黃雀螳螂顧其後。後身未必是韋皋。前身何意逢陳壽。讀書三歎心激昂。忽拜丞相之祠堂。當時五月渡瀘水。何異三年伐鬼方。七擒七縱非游戲。要使南人知此意。南人懷德兼畏威。長戈利刃何當揮。遂收四十有八部。巾扇無聲干羽舞。但見壯士銷金甲。邨民賽銅鼓。侯才勝曹甯十倍。侯祀留黔自千古。群祠會帥濟火兒。壺漿簞食迎西師。至今配食侯廟側。青囊藤甲裝束奇。彼曾生不識文字。矧又言語多支離。乃能從侯出險阻。拓境直至西南夷。陰平之險豈止此。恨無濟火相驕靡。嗚呼。恨無濟火相驕靡。咄咄艾艾何期期。

陽明書院懷古

白簡劾蠶室。青鞵謫龍場。遐陬鮮宦跡。以公爲輝光。昔聞叱馭來。當道多豺狼。賢愚非一致。身世忽兩忘。仙亦無有筴。佛亦無有航。粹然儒者言。知能皆天良。公本第一流。功名爛無伍。逆奄憎若蠅。強藩縛其虎。完人得忠孝。絕技綜文武。豈知始基之。乃在遷謫所。洞天有陽明。書院仍其名。徘徊不忍去。萬歲千秋情。公生旣爲英。沒則自有靈。公不坐而言。起亦自可行。將共天下寶。詎談紙上兵。始知講學事。無與公重輕。朱陸有同異。陽明亦流弊。且愁讀書多。於世工趨避。試問閱古泉。何與武夷山。蒼草從此留。諫草從此刪。清鎮道中卽事。

香鑪峰下雨。瘦馬不曾停。樹裏邨烟綠。山中石氣青。書從鴻雁寄。詩許鷓鴣聽。巖戶無人迹。閒雲晚自扃。石版房。

黃岡記竹樓。小戎歌板屋。牽蘿洵有情。誅茆亦不俗。客行到安莊。石片滿山麓。鋪爲石版房。請君此中宿。听然笑入門。秋氣何鑿鑿。石窗窈窕開。石壁周遭築。牀頭蟋蟀鳴。梁上苔花綠。我非石腸人。吟爲石城曲。聞石石不言。襤被弄寒玉。夢見黃石公。素書於此讀。

萬金買名園。千金構廣廈。三年石棹成。笑殺桓司馬。始知金屋高。不及石房雅。況補造化功。風雨不敢打。短衣夜射虎。飲羽南山下。倘勒燕然銘。四壁皆可寫。土人論三生。居處不能捨。深宵勸行客。小住亦云且。雖無簷兩重。差勝茆一把。不知人世間。霜壓鴛鴦瓦。

龍井在安順郡城山下。

珍珠一斛買傾城。未抵盧仝七椀情。禪榻茶烟何處颺。在山泉水本來清。碧波橋下春如瀉。藥玉船來酒共傾。拋得杭州未能去。枯腸根觸井眉名。

自安順赴鎮甯黔路之平者止此六十里

歷阻得夷塗。耳目曠無礙。清沙翠竹中。人馬各自在。天公久好奇。至此意頗悔。設險知昨非。履坦當晚蓋。驅除四面山。山勢盡謙退。野卉藉作茵。芳草積如黛。微風生其間。色相空所對。如久夢忽醒。亦少見多怪。回首睇層巒。烟雲互向背。絢爛歸平淡。悟入文章界。鴉飛聲啞啞。暝色肅歸隊。城角露紅燈。一州如斗大。

關嶺

不見一鳥飛。但聞萬馬響。四十有三盤。一盤一千丈。登峰竟造顛。始願所不想。頻瞰下諸山。諸山向我仰。短衣吹落葉。風片大於掌。穆駿尙徘徊。手捫青天蕩。解鞍憩古廟。目眩魂愉悅。倦忘人腹飢。熱聽馬蹄癢。試問此來遊。畢竟誰所強。白雲太行麓。余豈昧前往。願頌金護花。與山同長養。

漢將軍關索廟下作

廟在嶺絕頂。嶺從將軍姓也。碑稱將軍爲前將軍之子。當武鄉侯征南蠻時。將軍先驅至此。遂俎豆焉。余按臨沮之役。前將軍父子殉難。而將軍又史失其名。黔書所辨良是。然廟貌颯爽。民奉其祀。奇蹟所昭。不可以不作也。

烏道青天上。將軍百戰來。赤心先世業。白面少年才。史闕千秋恨。山空一廟開。書生慚橐筆。不記舊雲臺。

白水橋月夜

得月客夜行。月照夜行客。行過白水橋。水月一時白。

望水亭瀑布歌

天孫織錦愁復愁。當窗軋軋逢牽牛。停梭一晒秋水闊。閉聲對影私綢繆。不知何人訴天帝。帝怒倒決銀河流。浪花破蕊開頃刻。冰飛雪駭無停留。乘查之客疾歸去。西池王母驚防秋。南來烏鵲相拍浮。三十六隻芙蓉鷗。是時共工氏。以頭觸不周。慮妃手抱一卷石。欲塞五城十二樓。至今涓涓滴滴泐秋雨。雖有瓊斤壁鑿難補修。秦王開山五丁死。漏出一綫如鴻溝。溝水東西割江海。餘支散入西南州。州人不知天水碧。喚作瀑布真奇絕。耳如乖龍翻急雨。目如飛仙弄華雪。又如千軍萬馬中。白戰何曾持寸鐵。層層兜羅繇。層層真珠簾。行來夜郎國。讀破秋水篇。來牛去馬渺何處。老魚瘦蛟噤不前。雖有白玉京。爛銀峰。水精之宮。琉璃之屏風。有此色皎潔。無此聲宿礧。長橋蜿蜒微徑通。山聲水色天濛濛。孤亭一角聳而立。使我目千里窮。耳三日聾。開拓萬古之心胸。筆亦不能繪。聲聲亦轟無始終。彷彿關西大漢唱江東。化爲千百億萬右手亂撥琵琶銅。可惜奇境落天外。奇語橫胸中。李仙謝賊撻牢不及到。坐令匡廬天都龍湫雁宕一一欺英雄。題詩上馬掩耳走。蕭蕭萬籟無人蹤。

盤江

且蘭江上小徘徊。江水年年漲一回。纔送採船莊蹻去。又迎麾扇武侯來。

鐵鎖橫江替畫橈。綠碑殘蘚詔前朝。摩挲直上金鼇背。二百年前舊板橋。盤江鐵索橋。明布政使朱家民所建。竝撰碑記。朱又嘗於橋成日。賦詩有云。人從疊氣樓中過。我在金鼇背上觀。

雨行安南道中

南來行盡萬山阿。葉葉秋風怨綺羅。啼殺鶉鳩聲似水。晴雲山下雨雲多。濃烟潑墨霧籠鬟。百首新詩溼未刪。一角青天鋪作紙。分明題到米家山。

羊場月夜宿吳都勻太守戎帳作

射虎百蠻中。椎牛萬竈下。紅燈搖廣烟。翠帳支修架。四角雲銜銜。兩頭月霸霸。臥唱從軍行。吹笳碧山夜。

南籠凱歌三臺

嘉慶二年春正月。貴州狎苗韋朝元。綽號七絡鬚。妖婦王囊仙。舉兵反。朝元據當丈。囊仙據洞酒。各擁苗卒十餘萬。焚掠諸州縣堡塞。進犯南籠府城。上命雲貴總督勒保率師討之。自安順至普坪。轉戰五百餘里。閏六月解郡圍。賊退守巢穴。數挑戰不利。我兵乘勝夾擊。屢有斬獲。八月十五夜。分兵八道環攻之。賊衆宵潰。總兵官施縉遊擊王宏信。生擒兩逆還營。檻車送京師。露布以聞。南籠平。某從征幕府。謹獻凱歌三臺體詩四首。若其平定方略。當纂載史館。以紀膚功。某文辭庸陋。未敢及焉。

四野蕭條堅壁。三軍慷慨乘闔。蓋民望之若歲。亦兵至之如神。

右解圍

耳聽鉤勒格磔。眼看撲朔迷離。搏兔亦用全力。牽羊何處雙飛。

右擒渠

彼三戰而三北。我七縱而七禽。一騎奏功露布。五弦解慍風琴。

右奏捷

六月元戎十乘。七旬牙羽兩階。上方錫爵無算。諸將論功有差。

右策勦

苦雨

可怪催詩雨。朝朝暮暮添。居然千首溼。不唱兩頭纖。撥火香初冷。眠秋夢亦黏。高歌洗兵馬。開硯翠沾沾。

南籠軍營得沈小如武邑中秋書卻寄

白馬三軍去。青禽萬里來。陽關慳折柳。隴首健封梅。感舊心如寫。熏香手自開。秋風桂之樹。想見隔燈裁。四十商墮恨。書來忽曠然。得男三索後。買妾十年前。戊申小如買春吳下。余亦平視。帖寫塵甯誤。門藏鳳可傳。河陽花滿樹。爭似綠陰圓。

武邑分疆僻。文翁從政優。此才非百里。餘事亦千秋。剝燭紅催韻。彈琴翠欲流。贈君循吏傳。絕勝遠封侯。讀破銷魂賦。天涯海角行。髮絲空自颺。脾肉不曾生。劍氣雌雄語。錢歌上下成。書生無骨相。卽此是功名。

若問西南事。知君笑欲瑤。地遙天較近。人少石偏多。瘴癘秋霜殺。去□黔瘴過霜降。卽止。昏姻夜月歌。苗俗皆跳月。而合男女。參軍聽蠻語。不解意云何。

王粲從軍樂。吳均行路難。勞薪故車腳。春夢大刀鐙。笛譜飛三弄。弓衣繡百蠻。歸來逢沈約。一卷椎名山。奢香驛

消磨瘴癘翦蒿萊。九驛龍場一線開。山海經中三鳥去。女王國裏五丁來。朝天巾幘歸皇極。略地兜鍪失將才。今日烏蒙騎馬路。野花紅殺亂山堆。

小除日在興義作家書附寄女牀山人

織偏弓衣數酒籌。消磨獵旦與航秋。三年皮骨杜工部。一檄頭風袁豫州。自感將軍容揖客。浪傳夫壻覓封侯。分明絕域從征者。到此依然筆未投。

江紅海綠感韶華。來往楊花又雪花。萬竈貔貅前出塞。一牀蝴蝶夜還家。饒吹曲裏妃豨競。鏡聽詞邊客燕斜。卻笑書催濃墨字。似卿雙鬢亂堆鴉。

健爲東鄙舊邊城。勝帖家家寫太平。鄉信便隨春信去。軍功恰與歲功成。一年作客渾無賴。今夜題詩倍有情。此地花開時較早。放牛歸馬聽啼鶯。

夏葛冬裘歲屢遷。越禽代馬性難便。別期已醒中山酒。歸興多隨下水船。靄靄慈雲春一朵。濛濛零雨話三年。相逢莫訝囊羞澀。詩價騰昂壓兩肩。

幺妹詩

水西土千總龍躍。其先以從討吳三桂有功。世襲斯職。狎苗之畔。幕府檄調領土兵來赴。適躍臥疾。懼逗撓。乃遣其幺妹率屯練二百人。馳詣軍門從征。前後凡二十餘戰。禽馘最夥。歲除歲事。賞以牛酒銀牌。令還本寨。而加躍軍功一級。妹年十有八歲。形貌長白。結束上馬。出沒矢石間。指揮如意。亦絕徵之奇兵也。時王備兵留後興義。屬不佞爲詩送之。以焜燿其歸。因有是作。凡苗以行第最稚者爲幺云。

健婦猶當勝丈夫。雍容小字彼尤姝。然脂暝寫蔣三妹。歃血請行唐四姑。上馬一雙金齒屐。乘鸞十八玉腰奴。不須更結鴛鴦隊。白練裙開筆陣圖。迷離撲朔辨雄雌。千里明駝古有之。軍令靜原同處子。兵符端合付如姬。修來眉史功臣表。繡入弓衣幼婦詞。石砧兜鑿雲髻。不知巾幗定遺誰。

